
هَيْتَ حَلَاوَة

كوميديا من تأليف

محمد عنانى

مع دراسة نقدية بقلم

سمير سرحان



الهيئة المصرية العامة للكتاب
١٩٩٤

الإخراج الفنى والغلاف

نجوى شلبى

میت خلاوة ...

الأشخاص :

مكرم	قاهرى - جامعى
نبوية	متعلمة
فرج	متعلم ريفى
حميد	ريفي
محروس	ريفي ساذج
سونة	ريفية متعلمة
عبلة	ريفية بلهاء
غريب	قاهرى - جامعى
نبيه	ريفي
زقزوق	ريفي
ظريفة	ريفية
إبراهيم	ريفي
عبد العال	ريفي
الشاعر	
المغنية	
الراقصات	

رجال وسيدات (بعضهم له أدوار صغيرة جداً)

الفصل الأول

المشهد الأول

المختصر :

ساحة ريفية ضخمة تشبه أماكن انعقاد السوق حولها طرقات تؤدي إلى أماكن متعددة: إلى اليمين باب ضخم مفتوح دائما نرى من خلاله رفوف (الجمعية) الغاصة بالبضائع وإلى أقصى اليسار باب دكان يفتح ويقفل حسب دخول وخروج (حميد). في منتصف المسرح عدة كراسي قديمة تنتهي لمقهى بلدى متهالك فى أقصى الخلف وترايبزة أو اثنتان.

فى الخلف إلى اليسار مصطبة يستخدمها الشاعر فى الجلوس والإنشاد وفى الخلف إلى اليمين صورة كوبرى مكسور على ترعة أو فرع من فروع النيل. صور فى الخلفية البعيدة للحقول وبعض البيوت الريفية.

حينما ترتفع الستار نسمع إيقاعا مرحا سريعا (طبله أولا ثم دفوف ثم لحن موسيقى سريع وليكن تنويعا على «على حسب وداد قلبى» القديم) وعلى الفور يدخل الناس رجال وسيدات وهم يصفقون

ثم تدخل غازية ترقص على إيقاع سريع والناس تحاول أن تلمسها
وهي تراوغهم ثم يدخل (فرج) وخلفه طبال وزمار والشاعر - يجلس
الشاعر على المنصة ثم يتقدم فرج إلى منتصف المسرح أو يقف على
المنصة ويبدأ مخاطبة الحشود :

الوقت : الثلاثينيات .

المكان : قرية من طرح النيل غير موجودة على
الخريطة.

فرج : أرجوكم تسكتوا لحظة.. عندي خطبة صغيرة بمناسبة
اليوم الخالد ده.. مش كل يوم بتحصل أحداث عظيمة
زى دى.. (يقرأ من ورقة) لقد أحرز فريق التحطيط
نصرا خالدا..

الجمهور : يعيش.. يعيش..

فرج : اليوم يوم خالد..

الجمهور : يعيش.. يعيش..

فرج : لقد كتب لنا الخلود..

الجمهور : يعيش.. يعيش..

فرج : بفضل اللاعب الخالد..

الجمهور : بص شوف المرسى بيعمل إيه..

(يمكن أن يدخل هنا لاعبان يستعرضان فن
التحطيط)

فرج : وبهذه المناسبة تغنى لنا صاحبة الصوت الذهبى
(تدخل مطربة وتبدأ بالغناء على الفور)

المطربة : ارقصوا يا بناتنا وغنوا
والشاطر يعرض فنه
اليوم كدنا عوادينا
والدنيا بتحكى عنه
(يدخل مكرم لاهثا)
مكرم : فين فرج؟ (يراه) يا فرج.. فرج..
فرج : (ياتى إليه فى مقدمة المسرح بينما الرقص
مستمر)
أهلا مكرم أفندى..
مكرم : أنت فين يا فرج.. الحقنا..
فرج : خير ان شالله..
مكرم : غريب بك اللى وصل النهاردة الفجر طلع مفتش
ضرايب..
فرج : طيب وفيها ايه بس؟..
مكرم : فيها إيه ازاي؟ دا جاى يحقق فى الضرايب المتأخرة
على الناس.. بيقول ان الناس هنا عمرها ما دفعت
ضرايب للحكومة..
فرج : يا راجل روق كده ع الصبح.. خلىنا فى الصفة
الكبيرة.. انت مش عايز تسمع الشاعر؟
(تعود الموسيقى والمطربة)
المطربة : ارقصى ع الطيلة يا حميدة
خلىنا سوا للصباحية
اليوم نلنا امانينا

والخير فى ايديكى انتى وهيه
مكرم : (إلى فرج) يا فرج العملية مش هزار.. ممكن تقلب
بغم..
فرج : يا راجل فرافش وهيص.. مش دى الرقصة اللى انت
بتحبها؟
المطربة : الخير بيزيد فى ايدينا
والحب جمعنا ووجدنا
كلنا شركا فى الجمعية
ولا حد غريب داخل بينا
مكرم : (صائحا فى ضيق) اسمعنى أرجوك يا فرج.. خلينا
نتكلم جد... غريب بك ممكن يطريقها على دماغتنا.. أنا
صحيح موش من ميت حلاوة وما يهمنى.. لكن
برضه.. (متريدا) يهمنى..
فرج : انت طول عمرك نكدى.. من يوم ما وصلت وانت كده..
(فجأة يدخل غريب بك وهو موظف حكومة
تقليدى يرتدى طربوشا ويمسك منشأة
وحقيبة... يسير فى حذر ويتلفت حوله)
مكرم : أهو غريب بك.. اتفضل.. اتفضل يا غريب بك..
فرج : (يصرف الراقصات ويرحب بغريب بك) أهلا
أهلا ميت حلاوة نورت.. (ينهمك فى صرف
الراقصات وتنظيم جلسة الشاعر)
غريب : (فى حذر) إيه الهيمة دى؟
مكرم : دول الجماعة بيحتفلوا بانتصار الفريق..

غريب : أنا موش قادر أتلّم على نفسى م التعب..
مكرم : مغلّش.. أصل الحته بعيدة شوية..
غريب : بعيدة شوية بتقول؟ دانا خدت ركايب وعديت معدية
ومشيت فى الطين على رجلى وغطست شوية وقبيت
شوية..
مكرم : ولسه يا صاحى.. يا ما حتشوف..
غريب : أشوف إيه تانى؟ دانا كائى سافرت للقطب الشمالى..
مكرم : وبصراحة.. أنا موش عايز أخوفك.. لكن حتشوف
حاجات أغرب م القطب الشمالى..
غريب : قصدك إيه؟
مكرم : لا.. ولا يهكم.. أكل العيش مر..
غريب : يعنى الناس مش ناويين يدفعوا ضرايب؟
مكرم : يا ريت على قد كده.. دول عجب.. عجب عجب..
غريب : انت بقالك كتير هنا؟
مكرم : والله مش فاكر..
غريب : ازاي بس؟
مكرم : ميت حلاوة بتنسى الواحد نفسه.. فيه ناس بيقولوا
بقى لى شهر.. وفيه ناس بيقولوا سنة.. أنا شخصيا
موش فاكر..
غريب : غريبه..
مكرم : اللى عايزك تفهمه ان ميت حلاوة زى ما تقول نسيها
الزمن.. يعنى شوف احنا حاسين بالزمن قد إيه فى
مصر؟ كل يوم عندنا بييجيب جديد..

غريب : قصدك الراديو؟
مكرم : اختراع ممتاز.. ما حدث سمع عنه هنا.. ما حدث
سمع ع الجرايد حتى.. الناس عايشين زى ما كانوا
عايشين من خمسين والا من ميت سنة.. معزولين عن
بقية مصر والعالم..
غريب : أنا فعلا دخت على ما قدرت أحدد موقع المكان ده ع
الخريطة..
مكرم : كويس انك لقيته.. ده موش موجود فى خرايط كتيرة..
ومع ذلك فأنا رأيى أنه مكان ممتاز.. قدر ينسى الزمن
زى الزمن ما نسيه.. قدر يخلق لنفسه قوانينه
الخاصة.. أحكامه الغريبة.. اللي ما حدث يفهمها
غيره.. أصبح عالم غريب قائم بذاته - زى عالم الفن..
غريب : قصدك إيه؟
مكرم : لا مؤاخذه - يمكن انت مالكش فى الفن..
غريب : بالعكس دا أنا بحب الفن موت..
مكرم : كويس.. أهو زى ما يكون رواية مستقلة لها
أشخاصها وقوانينها وأحداثها..
غريب : قصدك شخصية مستقلة؟
مكرم : لا يا حبيبى لا.. أكثر من كده بكثير.. دول منقطعين عن
العالم الخارجى بصورة تامة.. شايف الكوبرى
المكسور اللي هناك ده؟ أنا فى رأيى إنه بيمثل العلاقة
اللى بينهم وبين أهل مصر كلها..
غريب : وانت جيت هنا لزاى؟

مكرم : دى قصة طويلة.. اتعينت بالغلط.. من كتر فرحتى
بالتعيين فى الحكومة كتبت ع الاستمارة يا ميت
حلاوة قام الموظف مضاهام المدير على أنها اسم
البلد اللى أنا رايجها..

غريب : الغلط يتصلح..

مكرم : مستحيل.. كان لازم انفذ يا تضيع الوظيفة..

غريب : ما فيش زى الحكومة.. لازم بتاخذ اتناشر جنيه زى..

مكرم : فى الحقيقة ما باخدش حاجة دلوقت خالص..

غريب : يا راجل مش معقول..

(تدخل سونة فى عجلة)

مكرم : سونة أمى.. لا مؤاخذه.. لازم أستاذن خمسة..

غريب : (غامزا فى فهم) ميعاد خصوصى؟

مكرم : حتعرف بعدين..

سونة : ازيك ياسى مكرم..

مكرم : ازيك يا سونة..

سونة : كنت عايزاك فى كلمة صغيرة..

مكرم : وماله.. اتفضلى..

سونة : أصلى مكسوفة..

مكرم : أه.. من البيك.. ولا يهملك.. دا الاستاذ غريب بك..

مأمور ضرايب..

غريب : تشرفنا يا هانم..

سونة : (تهمس له بعض الكلمات ثم تخرج)

مكرم : وهو كذلك..

(فرج يامر الشاعر بالانصراف ويواجه
الجمهور)

فرج : أرجوكم.. اسمعوني لحظة.. نظرا لظروف خارجة عن
لرايتنا.. وبصراحة لأن الشاعر لم يحفظ القصيدة..
فقد تقرر تأجيل الاحتفال إلى ما بعد العشا..
انصراف.. (صائحا).. انصراف بقول موعدنا بعد
العشا.. انصراف...
إظلام سريع

المشهد الثانى

(ترفع الستار فورا لنرى مكرم واقفا وحده)

مكرم : الدنيا ليلت أهه ولسه ما جتش.. يا ترى إيه اللى
أخرها كده؟ أنا واثق إنها قالت لى أشوفك المغربية
عند الجمعة..

(يدخل حميد)

حميد : انت لسه هنا يا مكرم أفندى؟

مكرم : أزيك يا عم حميد.. إيه اللى جابك دلوقت؟

حميد : خير.. خير.. كل خير..

مكرم : جاي تعمل إيه بقول؟

حميد : خير ان شاء الله..

مكرم : جاي تظمن على الدكان وتروح؟

حميد : لا والله.. أنا حاعمل تعميرة للصبح هنا.. أصل البلد

هايصة وأنا ما حبش الهيصة..

مكرم : آه.. عشان الفريق انتصر؟

حميد : لا.. عشان الغنم ضاعت..

مكرم : غنم مين لا سمح الله؟
حميد : غنم مين؟ جرى ايه يا مكرم أفندى؟ هو انت لسه
حاتعلم عن بلدنا؟
مكرم : قصدك غنم الجمعية؟
حميد : غنمنا كلنا..
مكرم : برضه مش فاهم..
حميد : وهى دى فيها حاجة تتفهم؟ أقعد أقعد.. خدلك نفسين
معاً هنا.. (يحضر جويزة ويقدم أخرى لمكرم).
اتفضل.. خد يا راجل روق دمك..
مكرم : معلش ما تاخذنيش.. بس أصلها موش داخله مخي..
غنم الناس.. غنم ميت حلاوة.. تضيع؟
حميد : ثلاث آلاف أربع تلاف راس.. كله ضاع..
(يقرقر الجويزة)
مكرم : بس ده موش ممكن! مستحيل!
حميد : إيه هو اللي موش ممكن؟ انت بتكذبني؟
مكرم : العفو يا حميد يا صاحبي.. بس أصله يعنى.. ازاي؟
حميد : زى الناس.. دهدي..
مكرم : بس الناس ما بتتسر قش..
حميد : بتضيع.. والغنم ضاعت..
مكرم : كانت فى زريبة لا مواخدة وبعدين راحت زريبة ثانية؟..
حميد : خرجت من كل زرايب البلد.. زهقت م الحبسة..
طهقت.. هجت..
مكرم : وما حدش عرف راحت فين.. م الجرة اللي ع الأرض/

من صوتها/ من ريحتها؟
حميد : شوف يا مكرم يا بنى.. الحاجات دى أكبر من
عقولنا.. الغنم باختصار سابت الزريبة الكبيرة
والزرايب الصغيرة كمان وخرجت..
مكرم : موش ممكن يكون حد سرقها؟
حميد : علمه عند ربى.. (يجلس ليدخن فى هدوء) أنا
خلينى مع الجوزة هنا للصباح لحد ما يهدوا.. زى كل
مرة..
مكرم : كل مرة ازاي؟
حميد : يعنى.. كل ما تضيع حاجة كتيرة كده يعملوا شوية
دوشة ويعددين يهدوا..
مكرم : لا مؤاخذه.. أصلى أول مرة أسمع فيها على حاجة
زى كده.. لسة ما عرفتش ميت حلاوة كويس..
حميد : الجوزة جاهزة..
مكرم : لا متشكر..
حميد : مستنى حد هنا؟
مكرم : لا أبداً.. ليه؟
حميد : باحسب البت سونة جاية تقابلك هنا..
مكرم : وايه اللى خلاك تتصور إنى.. إنى..
حميد : ايهيه.. آمال إيه اللى حيجيبك هنا بعد المغربية
لوحذك؟ إيه اللى يخليك تسبب غريب فرقع لوز بتاعك؟
مكرم : فرقع لوز مين؟ دا مأمور ضرايب..
حميد : وتنكر ليه؟ هى فيها حاجة؟ كنت بس عايز أقولك ان

سونة جايين تتأخر.. جوزها مشغول فى حكاية الغنم
ولسه ما حضر تلوش العشا..

مكرم : (مصعوقا) جوزها؟

حميد : لهوت ما تعرفش انها اتجوزت محروس الصبح؟

مكرم : لا.. لا.. آه.. لا.. فى الحقيقة

حميد : هى مش قالتك إنها حاتتجوز محروس الأول ويعدين
تتجوزك؟

مكرم : دا كان هزار..

حميد : مافيش حد حدانا بيهزر..

مكرم : خدعتنى..

حميد : خدعتك ليه بس؟ أهى اتجوزته زى ما قالتك..

مكرم : وهو ده موش خداع؟

حميد : خداع ليه كفى الله الشر؟ محروس اتقدم لها قبلك..
ووعده.. ويعدين اتقدمت لها انت ووعدتك.. يبقى انت
بعده..

مكرم : (منفجرا) بعده امتى بس يا حميد يا خويا؟ هو دخول

الحمام زى خروجه؟ خلاص.. اتجوزت محروس يبقى

أنا انتهيت.. وأنا اللي كنت حاطط أملى كله فيها..

وبصراحة ما صبرنيش ع البلد الغريبة دى إلا سونة..

حميد : يا ابنى اعقل.. سونة عند وعدها..

مكرم : وعد ايه بقى يا حميد انت كمان؟ بتحبنى وعايظه

تتجوزنى.. تقوم تتجوز واحد تانى؟

(يدخل رجلان إلى المحل المفتوح إلى أقصى

اليمين - الجمعية - فيحمان اكياسا ويخرجان

- مكرم : استنى يا جدع انت وهو.. رايعين فين؟
الرجل ١ : مسا الفل عليك..
الرجل ٢ : مسا الخير يا حميد..
مكرم : انتوا اخدين القمح ده ورايعين فين؟
الرجل ١ : نطحنه..
مكرم : أيوه عارف.. بس ده بتاعكو؟
الرجل ٢ : بتاعك انت؟
مكرم : لا..
الرجل ٢ : آمال إيه اللي مدايقك؟
مكرم : دا بتاع الجمعية.. بتاع المجتمع.. بتاع الناس..
الرجل ٢ : واحنا مش ناس برضه يا مكرم أفندى؟
مكرم : أيوه.. لكن..
الرجل ١ : لكن إيه بس؟ نورنا يا سيدنا الأفندى..
مكرم : إذا كل واحد خد شوية حيخلص..
الرجل ٢ : ما هو لازم يخلص م الجمعية عشان نجيب غيره م الصوامع..
مكرم : قصدى إذا اتوزع ع الناس كلها يمكن ينويكو أقل م اللي خدتوه.
الرجل ١ : ممكن..
الرجل ٢ : يعنى قصدك نرجع شوية..
الرجل ١ : قصدك أخذنا كثير..
مكرم : ما اعرفش..

الرجل ٢ : دا يدويك قد عشر أرغفة سن..
مكرم : كدهه؟
الرجل ١ : نرجع قد ايه؟
مكرم : ما اعرفش..
الرجل ٢ : ايه اللي ما اعرفش... أمال بس زعلان قوى ويتصرخ
ليه؟
الرجل ١ : يا لله بينا يا برهوم..
الرجل ٢ : خلتناك بعافية يا سى مكرم.. سلامو عليكم..
(يخرجان)
مكرم : أنا أعصابى تلفت يا حميد..
حميد : اللي يسمعك كده يقول دا لسه واصل النهارده. أمال
لو ما كانش بقى لك معانا مدة طويلة..
مكرم : نفسى أخذ على حكاية الجمعية دى موش قادر..
حميد : بكره حتأخذ عليها وعلى غيرها..
(ضجة فى الخلفية ويدخل رجل ومعه شرطى
ورجال كثيرون)
الرجل : ومشيت الغنم طوالى لحاد البحر..
الشرطى : كان معاهم ناس؟
الرجل : أبدا.. كان قدامهم زى ما تقول لا مؤاخذه كبش كبير.
حاجة محترمة.. بقرون ولية قاد كده..
الشرطى : عظيم عظيم ويعدين..
الرجل : تعالوا ورايا..
الشرطى : قول لى الأول.. كان فيه كباش تانية معاه؟

الرجل : أmaal.. ككبر..
الشرطى : عال.. عال..
امراة : (من وسط الحشد) سمان؟
الرجل : الا سمان.. حاجة تعجبك..
المرأة : كان فيهم واحد بقرن معوج؟
الشرطى : مش مهمة دى..
المرأة : ازاي مش مهمة؟ دا كنت حاطة عينى عليه.. كنت
غاوياء خالص..
الرجل : انا والله ما خدتش بالى..
الشرطى : إنما الكل اتجهوا ناحية البحر؟
(حميد يتقدم من الشرطى ويخاطبه)
حميد : انت عامل فى نفسك كده ليه يا عب عال؟ ايه اللى
ملبسك ميرى النهاردة؟
الشرطى : اعمل ايه؟ زنقة الغنم.. بكرة تفوت يا عم حميد..
حميد : (إلى الرجل) والكلام ده كان ع المغربية كده يا بنى؟
الرجل : ع المغربية بالطبط من دقيقة واحدة..
حميد : والغنم دى كلها فانت من هنا؟
الرجل : انا شايفها بعينى..
حميد : ولا سابتش جرة ع الأرض التراب دى كلها؟
الرجل : (متلعثما) ما هم.. ما هم.. كانوا يمشوا بشويش..
حميد : (إلى الشرطى) دا كداب يا عبدالعال..
الشرطى : كداب؟ (إلى الجمهور) الراجل كداب..
الجمهور : (يصيح) كداب.. كداب.. كداب..

(يخرج الجميع خلف الرجل الذى خاف وبدا
يجرى فى دعر من الجمهور)
مكرم : (إلى حميد) افيش أمل.. أروح أنا بقى..
حميد : يا بنى زمانها جاية.. مادام قالت جاية يبقى حتىجى..
مكرم حتىجى ولا ما تجيش.. ما خلاص..
حميد : خليك صبور بس.. أهو م (يؤجل) محروس)
مكرم : جوزها؟
محروس : مكرم أفندى.. سونة بتعتذر.. أصلها تعبانة شوية.. وع
العموم ان كان فيه حاجة تحب تقولها لها يا اما
تقوللى عليها - ما تنكسفش - او تتفضل معاى..
مكرم : قول لها كل سنة وانتى طيبة.. (يضحك حميد)
إظلام سريع

المشهد الثالث

(نفس المنظر - الشاعر يجلس ويدندن على
الربابة - فرج : يصطحب عبلة معه هذه المرة -
يعلن على الجمهور بداية الحفل)
فرج : الآن.. استجابة لطلب الجماهير.. شاعر الغبرا.
ومطرب الامرا.. زيد أبو زيد الدرويش..
الجمهور : يعيش.. يعيش..
الشاعر : (يبدأ) أول ما نبدى نصلى ع النبي المختار
واللى ما يسمع ينشوى بالنار
المصطفى أوصى بخرب الكافر
والحر ما يعاشر غير الأحرار
(مكرم يدخل ثائرا)
مكرم : (يسال مجموعة إلى اليمين) ما حدش عرف الغنم
راحت فين؟
(يسكت الشاعر بينما يتهامس الناس في
دهشة. غنم.. غنم..؟ غنم إيه؟)

(يسال مجموعة اخرى) ما حدش شاف خرفان

تايه؟ كام نعمة كده هايمة وضايعة؟

(لا أحد يلتفت إليه)

فرج.. انت يا ملك المهرجان.. سامعنى يا فرج..

فرج : (قادما إليه) إيه بس يا مكرم أفندى كفى الله الشر..

الناس عايزة تفرح وتزقطنط..

مكرم : ما حدش بيرد على ليه؟

فرج : م الفرحة يا مكرم..

مكرم : بالخيبة الثقيلة..؟

فرج : بالنصر العظيم.. بالخلود..

مكرم : انت موش عارف بيحصل إيه فى ميت حلاوة

النهاردة؟

فرج : يا أخى روق وهيص.. بقى يا مزيكا..

(أثناء الحوار التالى تتحرك شفاة الشاعر ولكن

دون أن نسمع ما يقول والناس تستحسن ما

يتغنى به)

مكرم : أعمل إيه عشان أخليك تفهم..

فرج : ما تقلقش.. أنا قلت للست نبوية وهى حتصرف..

مكرم : احنا مالنا ومالها دلوقت.. احنا فى المصيبة اللى احنا

فيها.. أنا لحد دلوقت موش عايز أقول لغريب بك ع

اللى بيحصل.. لكن مسيره يعرف.. وساعتها بقى..

فرج : الضرايب يعنى.. ولا يهملك.. ما حدش عنده فلوس

خالص..

مكرم : يا فرج يا خويا المسألة معقدة أكثر من كده.. احنا ممكن نخبي عنه حكاية الغنم دي..
فرج : تخبي إيه يا مكرم أفندي؟ احنا ما عندهناش حاجة تستخبي..
مكرم : دي مسئولية يا فرج..
فرج : مسئولية إيه وكلام فارغ إيه؟ ان كان عايز يشوف الغنم نوريها له..
مكرم : نوريها له منين؟ انت موش عارف ان الغنم ضاعت؟
فرج : نفرجه ع المعين..
مكرم : يا فرج افهمني.. الراجل بتاع قانون موش تاجر مواشى.. الحكومة هي اللي باعتاه..
فرج : بقي الحكومة تبعت أفندي محترم.. بيك بمنشة عشان يتفرج ع الغنم؟
مكرم : عشان يحقق في الضرايب..
فرج : اسمع يا مكرم.. انت احسن لك تقابل الست نبوية..
مكرم : أنا؟ أقابلها أنا؟
فرج : ما تخافش.. خليك جرى..
مكرم : تيجي معاي؟
فرج : لا.. قابلها انت واتفاهم معاها..
مكرم : لوحدى..
فرج : خليك راجل.. خليك مجدع.. مجدع..
(يرتفع صوت الشاعر بينما يتهاشم مكرم وفرج)

الشاعر : المجدع أبو أيوب شايل شومة

راجل ومولود بطل من يومه
نزل الحمى وحمى الوطيس قدامه
رفع الدراع ونزل كما الأعصار

زاغ العدو براسه تقولشى حنش
فارع طويل أبيض فى وشه نمش
سرخ العدو سرخة وهب كبش
راوغ كمثل التعلب المكار..

يومك يا أبو أيوب ما يهملكش
انهض وشدد ذراعك المفتول
نهض الفتوة زى شعلة نار
وفى لحظة أخرج خنجره البتار

خنجر مزنهر زى نور الفجر
راسه بتضوى جوه سابع ليل
غمزه الفتوة جوه بطن عدوه
خلاله يغنى أه يا عيني يا ليل
يعيش.. يعيش..

الجمهور : (اثناء الإنشاد فرج يترك مكرم وينادى عيلة
فتاتى إليهما بينما يدخل غريب بمجرد انتهاء

(الشاعر من آخر مقطع)

أهلا غريب بك.. اتفضل..

مكرم : (يتجه إليه ويرحب به بينما ينفرد فرج بعيلة)

إياك تكون استريحت شوية..

غريب : أبدا والله.. من ساعة ما سبتك وأنا بالف على

رجلى.. ما كنتش متصور ان البلد كبيرة للدرجة

دى..

مكرم : المهم تكون عجبك..

غريب : ظريفة.. ظريفة خالص..

مكرم : وناوى تمشى امتى..؟

غريب : لما انتهى من عملية الضرايب المتأخرة..

مكرم : طيب مادام حققعد معانا بقى..

غريب : اقعد معاكو ازاي؟

(تدخل سونة وتجرى إلى مكرم)

سـوـنـة : مكرم.. مكرم.. قالوا لى إنك هنا..

مكرم : ازيك يا سونة..

سـوـنـة : ازيك يا مكرم..

مكرم : وازى محروس..؟

سـوـنـة : انت زعلان منى..؟

مكرم : أبدا.. وحازعل منك ليه؟

سـوـنـة : انت بتهزر..

مكرم : ما حدش حدانا بيهزر..

غريب : (يتقدم منهما) اسمحى لى أقدم نفسى..

سـوـنـة : (مستمرة) يعنى حاتيجى معاى..
مـكـرم : آجى معاكى فين؟..
غـرـيب : مأمور ضرايب.. ليسانس حقوق..
سـوـنـة : ع البيت طبعاً..
مـكـرم : انهو بيت؟
سـوـنـة : بيتنا طبعاً.. دهنى.. داني بدور عليك م الصبح..
مـكـرم : محروس عايزنى فى حاجة..
سـوـنـة : كولنا.. كلتنا عايزينك يا سى مكرم..
غـرـيب : ما تروح معاها يا مكرم.. خليك اسبور. أنا أفهم فى
الحاجات دى كويس قوى.. اتفضل. ماتخافش علي..
أنا حاقدر اتصرف لوحدى..
مـكـرم : أنت عارف دى مين يا غريب بك؟
غـرـيب : سبق اتعرفنا..
مـكـرم : دى يا سيدى سونة هانم.. بنت أم سونة. حبيبتي..
كنت لحاد النهاردة الصبح بحبها ويتحبني
غـرـيب : وبطلتوا تحبوا فجأة ليه؟..
مـكـرم : أنا ما بطلتش.. بس هى اتجوزت محروس..
غـرـيب : رغم أنها بتحبك؟ غير منطقى..
سـوـنـة : يعنى إيه يا سى غريب؟..
غـرـيب : يعنى مش معقول..
(يتقدم منهم فرج وعيلة)
فـرج : إيه يا مكرم أفندى.. مش مندمج فى الحفل ليه؟
مـكـرم : الموضوع اتلعبك حبتين..

فـرج : خير انشالله..
 غـريب : اسمح لى أقدم نفسى..
 فـرج : أهلا غريب بك..
 غـريب : اسمى غريب.. وصلت الصبح.. والآنسة؟
 فـرج : أه.. دى عيلة.. خطيبتى..
 غـريب : (هامسا لمكرم) رائعة الجمال..
 مـكرم : (هامسا لغريب) ابعد عنها طوعنى..
 فـرج : كتكوتة خالص.. مش كده؟ أنا أول واحد بتتجوزه فى
 حياتها.. ايه رأيك يا غريب بك؟
 (مكرم يتعاتب مع سونة بعيدا)
 غـريب : مبروك..
 فـرج : حلوة؟
 غـريب : رائعة..
 فـرج : احنا بنحترم الجواز هنا جدا.. كل واحد لازم يتجوز..
 ومادام عاجباك يبقى..
 غـريب : (مقاطعا فى حرج) أنا ما قصدش يا فرج أفندى..
 فـرج : لا يمكن.. لازم نجوزك ونفرح بيبك..
 غـريب : (فى ارتباك شديد) يا فـرج أفندى أنا كنت
 باجاملك..
 فـرج : يعنى موش عاجباك؟..
 عـيلة : (تبكى) يا ميلة بختى يانى.. هم بنات مصر أحلى
 منى.. أه يانى أه يانى..
 غـريب : ما أقصدش يا عيلة هانم.. أنت شكلك ممتاز..

فـرج : يبقى اتفقنا .. خلاص ..
غـريب : بس أنا موش ممكن اتجوز .. أنا فى مهمة خاصة .. فى
مهمة رسمية .. فى شغل .. يا ناس افهمونى (يصيح
على مكرم) مكرم .. يا مكرم أفندى .. أرجوك الحقى ..
(مكرم وسونة يقتربان منهم)
مـكـرم : موش كنت بتقول حتقدر تتصرف؟
غـريب : موش وقت شماتة أرجوك .. اتكلم .. اشرح لهم إنى فى
مهمة رسمية ..
مـكـرم : طيب وماله ..
غـريب : يا مكرم دول عايزين يجوزونى ..
عـبـلة : (صارخة) شكلى ممتاز ..
مـكـرم : (ضاحكا) دى ميت حلاوة يا بيه ..
فـرج : واللى منه لابد عنه ..
غـريب : دى خطيبتك يا فرج أفندى ..
عـبـلة : اتجوزك بعد فرج على طول ..
فـرج : وأنا ما عنديش مانع ..
غـريب : لكن أنا عندى .. عندى عذر ..
فـرج : مافيش اعدار .. خلاص .. مبروك ..
(يعلو صوت الشاعر)
الشاعر : النور بدا زى القمر ما يهل
عم السما وكسا الجنائن طل
السعد وعد قالوها فى الامثال
مبروك لكل حبيب وليلة زى الفل

مكرم : (صائحا) بس يا شاعر الغبرا.. كفاية يا مطرب
الامرا.. (إلى غريب) عرفت أنا قصدى إيه يا غريب
بيه؟ أدى ميت حلاوة وأدى أول لحسة تلحسها منها..
لمعلوماتك.. كان فيه هنا ثلاث آلاف أربع آلاف راس
غنم وضاعوا.. حدش يعرف راحت فين؟ اسألهم..
(يسأل مجموعات الناس)
الغنم راحت فين؟ طارت؟ عدت البحر؟ أكلتها؟ طب
فين نصيبى؟ اتسرقت؟ ازاي؟ ازاي؟ الصرامي
حيوديه فين؟ ما كانش فيه غنم أصلا؟ طب دانا
شايفها بعينى دول؟ يا ناس حتجنن.. ضرايب ما
بتدفعوش موش شغلى... ما سمعتوش عن الراديو ولا
الجرديد ولا التليفون.. أريح.. ما عندكوش مواصلات
وخلافه.. أجدع.. إنما الغنم.. الغنم راحت فين.. الغنم
راحت فين.
(يعلو صوته فى كريسندو بينما يحيط به
الجمهور ويطبق عليه)
(ستار سريع)

المشهد الرابع

(نفس المنظر - ضوء النهار يعم - يدخل مكرم
وغريب من أقصى اليمين ويدخل فى الوقت
نفسه فرج من أقصى اليسار).
الناس تدخل الجمعية إلى أقصى اليمين
وتخرج محملة بالبضائع)
مكرم : أهو فرج يا غريب بك..
غريب : هو ميعادها الساعة كام..
مكرم : الضهر.. صباح الخير يا فرج..
فرج : أهلا وسهلا بغريب بك.. على الله تكون نمت كويس..
غريب : الست نبوية جاية الساعة كام؟
مكرم : ما قلتك الضهر..
غريب : يعنى الساعة..
مكرم : ما فيش ساعة.. فيه فجر وصبح وضحى وضهر
وعصر ومغرب وعشا.. وبعد العشا..
(يدخل حميد خارجا من باب دكانه)

حميد : لحقنا بقيتنا نهار؟
مكرم : ونهار.. وليل..
فرج : انت لسه سطل يا حميد؟
حميد : مين؟ فرج.. مكرم؟ انت لسه هنا..
مكرم : لانت عايز تفوق ولا حد غاوى يشوف نور النهار..
حميد : قصدك احرق دمي عشان افوق.. والا افوق عشان
احرق دمي؟ (في هدموم) ليه؟ فيه ايه في الدنيا
يستاهل حرق الدم؟
مكرم : ما هو مادام انت نايم في العسل حتعرف الحقيقة
ازاي؟
حميد : واعرف ليه؟..
مكرم : لا اه.. اسمح لي بقي..
غريب : انا عارف نوع الاستاذ حميد كويس.. فاهمه تمام..
مكرم : انا مش قللتك تسكت يا غريب بيه؟ انت عايز تطير
شوية المخ اللي فاضلين لي؟ احنا موش اتفقنا انك
تسكت خالص وما تتكلمش إلا في الخرايب
المتأخرة..
غريب : بقي لها سنين..
مكرم : ومع الست نبوية بس..
غريب : أعصابك تلفت خالص يا مكرم أفندي..
مكرم : أعصابي.. (في انهيار واضطراب شديد) أعصابي
حديد.. نحاس.. فولاذ.. اصل انا ممكن استحمل..
ممكن اتغير.. (صارخا) انت فاكركني هفا؟

غريب : ما تشوف له حاجة ياخدھا يا استاذ فرج.. (إلى حميد) حاجة تهدي أعصابه يا استاذ حميد.. أنا مش مستريح لمتظره أبدا..

مكرم : (صائحا) ما له منظرى يا عمر؟ مش أحسن من فرج.. بقى تصدق ان فرج ده خريج جامعة زينا.. فرج ده اللى دلوقت لابس بلدى واتخصص فى المهرجانات والفوازى والمطريات.. اتحول.. انتهى يا غريب بك.. أنا لا يمكن اتحول.. ولا أنت ليه؟..

فرج : كفاية بقى يا مكرم أفندى..

حميد : أنا متھيا لى سمعت الكلام ده قبل كده.. امتى يا حميد.. زمان خالص..

فرج : أرجوك يا مكرم.. تعالى معاى نستعجل الست نبوية.. (يسحبھ من ذراعھ)

مكرم : ليه؟ ما قلتيش ليه؟

فرج : تعال بس..

(يخرجان)

حميد : من أيام طنابير الية ما ضاعت..

غريب : (مدهوشا) ودى ضاعت زى الغنم كده ما ضاعت؟ يعنى مشيت لوحدها كده؟ هجت؟

حميد : دى حاجة فوق عقولنا يا غريب بيه..

غريب : أقصد يعنى مفهوم إن الغنم تمشى.. تزھق.. تسبب الحظيرة وتخرج.. لكن الطنابير.. ازاي؟

حميد : وانت يھمك فى ايه؟ انت مالك؟

غريب : مالى ازاي؟
حميد : هي طنابيرك؟
غريب : لا.. بس برضه يهمنى..
حميد : ليه؟
غريب : طبيعة عملى.. حضرتك عارف انى باحقق فى
الضرايب المتأخرة على ميت حلاوة..
حميد : ميت حلاوة كلها مرة واحدة؟
غريب : ثبت لنا من دفاتر الحكومة فى مصر انه ما دخلش
للدولة اى ضرايب من اهالى المنطقة دى من سنين
وسنين..
حميد : الضرايب دى فلوس يعنى؟
غريب : طبعا..
حميد : بس احنا ما عندناش..
غريب : ما عندكوش ايه؟
حميد : عندنا.. بس قليل..
غريب : تدفعوا.. على قدكوا..
حميد : قليل يعنى..
غريب : قليل والا كتير..
حميد : بس احنا ما عندناش..
غريب : ويعدين يا استاذ حميد؟ الاراضى.. المحاصيل..
الغلال.. المواشى والاغنام..
حميد : ايوه صحيح..
غريب : دى كلها تساوى كتير..

(صمت)

حميد : صحيح ..
غريب : وعشان كده لازم تدفعوا حق الدولة..
حميد : صحيح ..
غريب : لأن الدولة لها حق .. لها نصيب فى كل حاجة عندكو..
مقابل الخدمات العامة اللى الدولة بتأديها لكم..
حميد : صحيح..
غريب : كل الخدمات اللى انتو ما تقدروش عليها لوحدكم..
زى الطرق .. الشوارع..
حميد : مالها الطرق؟
ريب : الطرق اللى الحكومة بتعملها .. الطرق المرصوفة..
حميد : هى الحكومة بتعمل طرق..
غريب : طبعا .. وشوارع وكبارى .. طرق مرصوفة عشان
المواصلات..
حميد : لكن احنا ما عندناش لا طرق مرصوفة ولا كبارى..
غريب : ازاي بقى؟ طبعا فيه .. آمال بتمشوا فى ايه؟
حميد : قصدك حوارى ميت حلاوة؟
غريب : والطرق اللى واصله لها..
حميد : بس دى معموله من زمان واصل .. من قبل الخديوى
عباس أفندينا..
غريب : (يضحك) ولو .. ولو يا استاذ حميد .. بس دى
اتصلحت..
حميد : أبدا .. عمرها ما اتصلحت..

غريب : اللهم الهنا الصبر.. بلاش الطرق.. عندك الإنارة..
حميد : اللّمس الجاز؟ الكلوبات دهى بتاعة الحكومة كمان؟
غريب : بلاش اللّمس.. الميه..
حميد : النيل؟
غريب : (منفجرا) المرافق العامة والخدمات التى لا يستطيع
الأفراد القيام بها هذا إلى جانب..
حميد : (مقاطعا) والله يا فندى أنا مش فاهم حاجة واصل..
أنا قايم لمراتى.. (هامسا) أصل مراتى ماتحبنيش
أتأخر واصل (يضحك)
غريب : طب اتفضل.. اتفضل.. (صارخا) روح.. روح لها..
روح!
حميد : انت أعصابك فايرة ليه؟
غريب : أنا أعصابى فايرة؟
حميد : زى مكرم أفندى.. إحنا حناخد إيه م الدنيا.. أول
واحدة اتجوزتها كانت زيكو كده.. والناس زمان قبل
ما تعملوا الجمعية كانوا زيكو كدة.. يتخانقوا
ويزعقوا.. كل واحد كان عنده حنة أرض
واللا غنماية.. يحصل لها حاجة يروح مزعق.. هو
الزعيق حيجيب إيه؟ كانت الدنيا تتكركب كل يوم ع
الفاضى.. لحد ما عملوا الجمعية..
غريب : دا من زمان قوى؟
حميد : أنا فاكر بقى!
غريب : من خمسين سنة مثلا؟

حميد : يقول لك موش فاكرو.. وافتكرو ليه؟ (يضحك) مراتي الجديدة ما تحبنيش افتكرو حاجة واصل.. أروح الدكان ان كان فيه حاجة تتعمل أعملها.. وان ما كانش فيه.. طظ..

غريب : (مقاطعا) مفهوم مفهوم.. لكن قولى.. انت بتكسب كام فى الشهر؟

حميد : باكسب إيه؟

غريب : فلوس يعنى..

حميد : ما اعرفش والله..

غريب : ما تعرفش ازاي؟

حميد : ما احبش أعرف الحاجات دى.. وتفرق ايه يعنى؟ اللى باعوزه باخده م الجمعية ع البطاقة وخلص..

غريب : بس الإنسان بيحتاج لحاجات تانية غير الأكل واللبس..

حميد : (يضحك فى خبث) عارف عارف..

غريب : (يضحك فى غيظ) كده كده..

حميد : انا اتاخرت عليها ياما.. سلامو عليكم..

(يخرج)

غريب : (وحده على المسرح) انا بدأت أفهم الناس دول..

كلهم تعابين.. الهيصة اللى عاملينها دى.. الموالد

والأفراح والليالى الملاح.. كله نصب.. عايزين

ياخدوني فى دوكه ويتهريوا م الضرايب.. آل عاملين

جمعية آل.. حاطين فيها كل حاجة.. آل يعنى

بيشتركوا فى كل حاجة.. وما فيش حد عنده ملك خاص.. ولا ما يكونش لحد ملك خاص.. يبقى ما فيش على حد ضرايب.. لكن على مين؟ أنا حاوريهم.. (يتردد ويفكر) ومع ذلك.. ده زى الحلم اللى طول عمري بالحلمه.. الناس كلها قابلاى على إنى بيك وأخر احترامات.. وحتى.. خوف.. أى والله خوف.. أنا ممكن أبقي حاجة تانية خالص فى البلد دى.. حاجة كبيرة قوى لو قدرت أخش فيهم وألعب اللعبة بتاعتهم وأبقى زيه.. (ينظر إلى الساعة فى قلق) بس ازاي؟ الست نبوية هى المشرفة ع الجمعية.. لو قدرت اتفاهم معاها.. افكرت! دى حتى بعثالى نشرة النهاردة الصبح.. فين؟ أهيه.. (يقرأ من ورقة) حينما يصبح كل شىء ملكا للجميع يتم القضاء على الاحتكار والاستغلال اللذين يتبعان أساسا من غريزة التملك.. من التركيز على الذات وشهوة السيطرة على المادة.. وما يتبع ذلك من نزوع للسيطرة على الآخرين.. (يتأمل) كلام غريب.. (يعود للقراءة) ان مجتمعنا قد تخلص نهائيا من الفردية ونزع بكل طاقاته نحو الحب.. (يفكر) الحب.. انهو حب؟ (تدخل عبلة)

عبلة : حبيبى..

غريب : عبلة..؟

عبلة : حبيبى..

غريب : إيه اللي جابك؟
 عبلة : أنت مش بتحبنى..
 غريب : انتى جميلة جدا لكن - اسمعى - فرج زمانه جاي..
 عبلة : أنا مالى وماله.. أنا جاية لك انت..
 غريب : هو مش خطيبك برضه؟
 عبلة : أنا بحبك (تتقدم منه)
 غريب : (يبتعد عنها) عبلة..
 عبلة : يعنى موش عايزنى أنا عيبى إيه؟ (تبكى) آه يانى.. آه
 يانى.. عشان موش من مصر؟ هم بنات مصر أحلى
 منى؟
 غريب : ما تعيطيش يا عبلة.. انتى روعة.. وقمر.. وكويسه
 خالص!
 عبلة : (تتغير من بكاء إلى فرح مفاجيء) يعنى بتحبنى..
 وحتجوزنى؟
 غريب : وفرج يا عبلة؟ نوويه فين؟ (يصيح فى جنون) يا
 مثبت العقل يا رب.. ممكن أفهم ازاي أتجوزك وانتى
 مخطوبة؟ ممكن تقولى لى..
 عبلة : ما هو.. بعد منه حاتجوزك على طول..
 غريب : بعد منه؟ بعد ما يفرج عنك؟
 عبلة : دا كلتها يومين يا سى غريب (فى سعادة) يا سى
 لفندى..
 غريب : كلها يومين ويسيبك..
 عبلة : آمال إيه؟ يا سعدك يا هناكى.. يا مرات لفندى.. لفندى

الحلو.. لفندى القمر..
 (تغازله وتشاغله)
 غريب : اسمعى بس يا عيلة..
 عيلة : حبيبك ونصيبك..
 غريب : اسمعى بس أرجوكى.. ممكن تقولى لى..
 عيلة : أقولك وتقولى يا لفندى..
 غريب : إيه اللى يخليه يسبيك؟..
 عيلة : الا ليه.. زى الناس.. عادى..
 غريب : هى الناس بتسيب بعض عادى؟
 عيلة : أما أنت غريب صحيح..
 غريب : أنا اللى غريب (يضررب كفا بكف) إيه اللى يخلي
 راجل يسبي مراته؟ ممكن تقولى لى؟
 عيلة : الوقت.. (فى رزاقنة) لما وقته يخلص..
 غريب : (ساخرا) يعنى.. مدة الخدمة؟
 عيلة : (لا تفهم) خدمة إيه؟
 غريب : أقصد يعنى.. عايزين تحددوا عقود الجواز بتاعكم
 بمدة.. بفترة زمنية؟
 عيلة : (لا تفهم) كلامك حلو يا لفندى..
 غريب : يعنى.. لازم تنتهى فى وقت محدد؟
 عيلة : أمال تفضل طوالى؟
 غريب : موش تأبيدة يعنى؟
 عيلة : موش أه؟
 غريب : موش مهم.. والوقت ده.. قد إيه؟

عـبـلة : حسب وحسب
غـرـيب : ينص عليه فى العقد؟
عـبـلة : كلامك حلو يا لفندى..
غـرـيب : وأنا اذا اتجوزتك برضه لازم اسبيك؟
عـبـلة : عايز تسيبنى (تبكى) تسيبنى ليه؟ أنا عملت حاجة؟
غـرـيب : يا عبلة بس اسمعى..
عـبـلة : دانا بحبك خالص..
غـرـيب : (فى لهجة حاسمة) شوفى بقى.. تعطى ما تعيطيش
أنا موش حاتجوزك.. انتو الظاهر عايزين تلغوا
الاحتكار فى الجواز برضه.. والظاهر ان الجمعية
بتاعتكو حتخرب الدنيا خالص..
عـبـلة : (تبكى) مش حتتجوزنى.. أه يانى.. أه يانى..
غـرـيب : أصله كله كوم والغاء الاحتكار فى الحاجات دى كوم..
شوفى يا عبلة.. أنا اذا كنت حاتجوزك يبقى على
طول.. فاهمه؟ مؤيد.. موش أجوزك من هنا وتروحى
تشوفى لك واحد تانى من هنا؟
عـبـلة : أبدا.. أبدا..
غـرـيب : أبدا ازاي؟ أنا فاهمك كويس..
عـبـلة : أبدا.. أبدا..
غـرـيب : ماديحنا فيها.. لسه مخطوبة وجاية تخطبيني..
عـبـلة : دانا بحبك..
غـرـيب : لا احبك ولا تحبيني..
عـبـلة : يا ميلة بختى يانى.. أه يانى أه يانى.. (تخرج)

غريب : متياللى عيلة بتخرف.. موش ممكن يبقى فيه عقود
جواز بالشكل ده.. والا يمكن برضا الطرفين.. برضه
موش ممكن.. لازم ادرس الموضوع كويس..
(يدخل مكرم وحده حاملا حقيبة صغيرة)
مكرم : انت لسه بتستنى يا غريب بك؟
غريب : انتو مش رحتوا تستعجلو نبوية هانم؟
مكرم : أنا ماليش دعوة يا عم..
غريب : انتو موش قلتوا..
مكرم : قلتك أنا ما ليش دعوة.. فرج اللى قال وفرج اللى
راح.. أنا موش من ميت حلاوة.. (متريدا) ولو انى
منها برضه.. عايز أهج وموش قادر.. بس موش قادر
ليه؟ ما هى الغنم هجت!! انت موش شايف انها حاجة
غريبة برضه ان الغنم تهج؟ متأسف يا غريب بك اللى
باكلكم فى موضوع تانى غير الضرايب.
غريب : مفهوم مفهوم..
مكرم : ما اعتقدتش انك فاهم..
غريب : حافهم ايه تانى؟
مكرم : الموضوع باختصار ان بقى لى اربعة وعشرين ساعة
ما نمتش دقيقة واحدة.. من ساعة ما ضاعت الغنم
وأنا بلف الغيطان والبلد حطة حطة.. أسال واشمشم
هنا وهناك.. عملت المستحيل قبل ما آجى أخذك على
هنا عشان تقابل نبوية هانم..
غريب : كان باين عليك فعلا..

مكرم : اللى موش باين على هو - ما تاخذنيش - إحساس
غريب بالخوف..
غريب : بالخوف بتقول؟
مكرم : بالخوف.. بالرغبة.. يمكن بالرعب كمان.. الرعب اللى
بيجى م المجهول..
غريب : دانت التعب أثر فيك تمام..
مكرم : أبدا.. أنا حاسس ان اللى حصل امبارح ده.. بدل ما
يلقى الضوء على اللى ماكنتش فاهمه فى ميت حلاوة
خلانى أواجه كهف ضلمة غويط.. مليان بالأسرار
والألغاز..
غريب : كل ده عشان سونة سابتك؟
مكرم : أبدا.. عشان سونة ما سابتنيش!! لو كانت سابتنى
عادى ما كانش بقى فيه لغز..
غريب : انت اللى بقيت لغز..
مكرم : اسمعنى بس.. سونة دى أنا حبيبها.. بنت ذكية وحلوه
وصحبتها متعة.. كنت عارف ان محروس بيجرى
وراها صحيح وانهم بيشتغلوا سوا فى الغيط إلى
آخره.. لكن دا ما يمنعهش انها استجابت لى.. كنت
واثق انه يوما ما.. يوما.. ما.. فى المستقبل البعيد
يمكن.. حنتجوز.. ميت حلاوة أصبحت بالنسبة لى
حلم جميل ودا اللى خلانى أبطل هندسة وزراعة
وأتعلم صناعة السلال..
غريب : صناعة السلال؟

مكرم : أه.. مالها السلال؟ جمع سله.. يعنى سبت!! كنت
قررت أشتغل بالسلال؟ عيبها ايه؟ قررت أبقي زى
أهل ميت حلاوة.. وأعيش هنا زى الناس ما هى
عايشة.. يزرعوا ويقلعوا ويأكلوا ويشربوا ويناموا
ويلعبوا تحطيب ويغنوا ويرقصوا.. حياة هانئة رائعة
زى حياة المعمرين بتوع أمريكا الجنوبية.. كان اتهايل
انى فهمت ميت حلاوة تمام.. ويعدين..

(صمت)

غريب : ويعدين سونة اتجوزت محروس!

مكرم : لا.. ويعدين الغنم ضاعت!

غريب : ودى علاقتها ايه؟

مكرم : زى ما قلتك.. لقيتني بواجه كهف ضلعة مخيف مش
عارف أوله من آخره.. فاهمنى؟

غريب : مش فاهم حاجة أبدا..

مكرم : يا أخى المسألة واضحة.. الحلم بتاعى كان فردى.. ما
كنتش بأحلم أكثر من انى أحقق ذاتى.. ولو انه حلم
متواضع فى الحقيقة.. يعنى السلال..

غريب : وممكن لسه تحققه..

مكرم : مستحيل! الغلطة الكبيرة كانت الغنم..

غريب : وانت مالك بيها بس؟

مكرم : هى دى الغلطة.. كان لازم أقول أنا مالى بيها.. كان
لازم أطلع نفسى منها لكن بمجرد ما شغلت نفسى
بيها لقيت الكهف بينفتح.. والقوة الغريبة.. كأنها قوة

القدر نفسه.. بتواجهنى.. حسيت ان الحلم الصغير
بتاعى بقى خيط تافه وسط كابوس كبير.. ماعاش
عندى القدرة على انى ارسم طريق حياتى او حتى
احلم.. (صمت) والغريب إن المسألة حصلت بسرعة
جدا.. ضاعت الغنم.. وطارت سونة.. وبدأ الحلم
يتشتت..

غريب : انت النهاردة شارب حاجة.. موش معقول كلامك ده..
مكرم : انا خايف يا غريب..
غريب : موش ده مكرم اللى كان معاى الصبح.. بيظمن فى
ويهدى أعصابى!
مكرم : انا خايف م اللى كنت خايف عليك انت منه.. الضياع!
غريب : لا.. ما يهملكش..
مكرم : ما قصدش الضياع النفسى اللى درسناه فى
الجامعة.. الضياع الحقيقى!
غريب : زى الغنم مثلاً؟
مكرم : زى الغنم!
غريب : حلوه دى!
مكرم : إيه اللى حلو فيها؟. أنا عارف انه فيه ناس ضاعت..
كثير.. اتهموا فى قضية والا حاجة.. ويعدين ضاعوا..
غريب : تاهوا يعنى؟
مكرم : يعنى الناس صحبوا الصبح ما لقيوهمش!
غريب : بكره يلاقوهم.. يا راجل روق..
مكرم : انا خايف يا غريب..

(يدخل جماعة يصيحون وعلى رأسهم رجل
يقول أهه أهه والناس تهتف خلفه)
الرجل : أهه.. أهه.. حرامى الغنم..
الجمهور : (يهتف) إلى الجحيم يا عدو الشعب..
الرجل : (مشيرا إلى مكرم) ابو بدلة قديمة.. دهه!
الجمهور : يسقط عدو الجمعية.. يسقط عدو الجمعية..
(مكرم يحاول الهرب بحقيبته والاختباء
والاحتماء خلف غريب)
مكرم : عايزين إيه؟ أنا برى..
غريب : انتوا مجانين.. ابعد أنت وهو..
الجمهور : يسقط عدو الشعب.. يسقط عدو الشعب..
(يطبقون عليه)
مكرم : أنا ضعت!
رجل : اقتلوه..
رجل : ادبحوه..
رجل : أسلخوه..
(تدخل الست نبوية - يصعق الجميع
ويتسمرون فى أماكنهم ويهمسون جميعا -
الست.. الست نبوية الست).
نبوية : سييوه..
مكرم : يا منجى م المهلاك يا رب..
نبوية : إيه الدوشة دى انت وهو (تنادى على الشرطى)
عبدالعال.. تعال خذ الاثنين اللى قالوا ادبحوه

واسلخوه على بره..
الرجلان : مش قصدنا يا ست.. ارحمينا يا ست..
نبوية : احنا لغينا القتل والديع من زمان.. انتو مش عارفين كده؟
الرجلان : احنا فى عرضك يا ست.. الرحمة.. الغفران..
نبوية : اللى يخرج عن تقاليد الجمعية ومبادئها مصيره إيه؟
الجمهور : يسقط الخونة.. إلى الجحيم يا خونة..
نبوية : خدهم يا عبدالعال.. حانقق معاهم ونشوف مين من بره ميت حلاوة حط فى بقهم الكلام الفارغ ده..
الرجلان : (خارجين مع عبدالعال) الرحمة.. الغفران..
(يخرجان مع الشرطى)
نبوية : أنا سمعت عنكم كثير.. انت مكرم.. والغريب ده..
غريب : أتشرف بأنى أقدم نفسى.. غريب بك.. مفتش ضرايب..
نبوية : اهلا وسهلا..
غريب : أنا باستنى حضرتك م الصبح..
نبوية : أنا عايزاك تيجى لى بيت الشعب ع المغربية.. فرج حيورك السكة..
مكرم : وهو كذلك..
غريب : أنا كنت باقول..
نبوية : أنا حاشوفك يا غريب بك بكره فى مقر الجمعية.. فين فرج؟
(يظهر فرج من وسط الحشود)

فرج : أمرك..

نبوية : فرج.. فرق الناس وتعالى معايا..

فرج : أمرك..

(فرج يصرف الجمهور ثم يخرج مع الست)

(مكرم وغريب وحدهما على المسرح)

غريب : جت سليمة الحمد لله..

مكرم : (فى رعب شديد) انا خايف يا غريب..

غريب : ما خلاص يا مكرم بقى.. جات سليمة بقواك.. خايف

من ايه تانى؟!

مكرم : م الغنم يا غريب.. م الغنم.. الغنم..!

«ستار»

الفصل الثاني

المشهد الأول

(منزل ريفي فخم ضخم - كل شيء ينم عن ثراء -
مكتب في الوسط ومكتبة في الخلفية - صور
على الجدار لموسيقين - نصف غرفة مكتب ترى
إلى اليسار - وستائر في كل مكان).
(وعندما ترتفع الستار نرى فرج يحاول اخراج
نبيه.. ونبيه يعترض).

فرج : موش أصول اللي بتعمله ده..

نبيه : دا بيت الشعب..

فرج : ولو.. برضه تستأذن عشان الست نبوية يمكن لسه
نايمه..

نبيه : لسه نايمه ازاي بس.. بقينا الضهريه اه.. ثم احنا
بقى لنا شهر وزيادة ما عقدناش اجتماعات

فرج : تعالى بس معاي نستنى بره..

نبيه : الرجاله موش ممكن يستنوا أكثر من كده..

فرج : اؤكد لك ان الاجتماع مش حيتاجل.. مكرم أفندي أكد

لى.. وأنا عارف انه صاحى من بىرى..
نبوية : أنا سمعت انه من يوم ما اتجوز الست نبوية وسكن
هنا والموايد اتخبطت.. شهر وزيادة.
فرج : يا أخى بس تعالى معا..
(يشده ويخرجان)
(بمجرد خروجهما تدخل الست نبوية ومعها
مكرم يتهاامسان وفى حالة نفسية هادئة
وابتسامات)
نبوية : (ضاحكة على نكتة همسها لها مكرم) لا لا لا..
كفاية..
مكرم : (يهمس شيئاً)
نبوية : (ضاحكة) أنت حكايك إيه النهارده؟
مكرم : (يهمس ثانياً)
نبوية : مش معقول... صحيح؟
مكرم : زى ما بقولك..
نبوية : وازاى قدرت.. المده دى كلها؟
مكرم : ما كانش فيه حل..
نبوية : ما قدرتش تفهم الإنسان.. دا رابى فى الموضوع.
مكرم : والله لا الهندسة ولا الزراعة عايزه فهم عميق
للإنسان..
نبوية : يمكن.. لكن خلاص.. الحمد لله.. (تستدير إليه فى
شغف) لقينا بعض بعد سنين.. من بعد النهارده ما
فيش داعى بقى للقلق والتردد..

مكرم : برضه موش قادر أصدق..
نبوية : انت موش شفت كل حاجة.. أنا موش وريتك بنفسى
كل اللي كنت عايز تشوفه.. وأكثر كمان؟
مكرم : دا صحيح..
نبوية : عايز ايه تانى بقى؟
مكرم : موش عارف..
نبوية : لالا.. احنا اتفقنا نبطل حكاية موش عارف دى..
مكرم : طبعاً طبعاً..
نبوية : انت بقيت تعرف كل حاجة..
مكرم : طبعاً طبعاً..
نبوية : موش بس تعترف.. انت بقيت فى موقف (تضحك)
قصدي فى مركز مختلف النهارده..
مكرم : ما فيهاش كلام..
نبوية : خلاص.. بالله بينا نخلص الشغل اللي فى ايدينا ده..
(بدلال) احنا بقى لنا كثير سايين الشغل..
مكرم : فات الزمن زى الأحلام..
نبوية : وأجمل م الأحلام.. (تغير لهجتها) نشوف بقى
مشروع القناية؟..
مكرم : ما قلتك كله جامز.. الورق اهو والرسومات وكل
حاجة..
نبوية : عظيم..
مكرم : العقبة الوحيدة هى التكاليف..
نبوية : أنا موش قلتك تنسى الموضوع ده؟ كام مرة شرحت

لك.. المعدات عندنا والأنفار موجودين. والجمعية
متكفلة بكل حاجة.. (جادة) حاول بقى تنسى
الاصطلاحات السخيفة بتاعة الجامعة دى.. التكاليف
دى كلمة تستخدم بس لما نكون محتاجين لحاجة من
بره.. لكن احنا اه (تريه ورقة) عندنا كل حاجة فى
ميت حلاوة..

مكرم : أقصد.. موازنة التكاليف والأرباح..
نبوية : (بدلال) وپرضه تنسى كلمة الأرباح دى..
مكرم : نسيت..
نبوية : يا مكرم يا حبيبى مادام كل حاجة فى ايدينا وپترجع
لنا احنا يبقى خلاص..
مكرم : أقصد التوزيع الـ ..
نبوية : وكلمة التوزيع كمان.. (تضحك) يظهر بتعرف تشتغل
أحسن فى أودة الشغل.. (تغمز له) تعال معايا..
مكرم : وهو كذلك..

(يخرجان بينما يدخل من اليسار فرج ومعه
محروس ونبيه وحמיד)
فرج : اتفضلو.. اتفضلوا.. اتفضلوا.. محروس. انتو اخوات
مافيش داعى للعزاييم.. (يجلسهم حول مائدة
مستديرة) نبيه يمكن ما حضرشى جزء من الأحداث
الآخيرة وعشان كده لازم أوضح له ان الهدف من
الاجتماع النهارده يختلف عن كل مرة..
نبيه : أنا عندى فكرة مبدئية..

فرج : ما تاخذنيش يا نبيه يا خويا .. انت بعدك عننا الفترة
دى كان له اثره فى ادراكك للمشاكل اللى بتواجهنا ..
وده طبعا ما ياترش على مركزك كعضو فى ادارة
الجمعية ..
نبيه : (ينهض معترضاً) أنا اطالب بتفسير للملاحظة
الآخيرة دى ..
فرج : هدى نفسك يا نبيه .. أنا موش باهددك ..
نبيه : التلويح بالتهديد ممكن يجع أكثر م التهديد ..
محروس : اسمع يا نبيه يا خويا .. احنا إذا بدأنا الاجتماع
بالشكل ده يبقى موش ممكن حنوصل لحاجة أبدا ..
حميد : (فى لهجة جادة كأنما هو شخص مختلف
تماماً عما رأيناه فى الفصل الأول)
فرج يقصد ان عدم معرفتك بالمشاكل «لن يؤثر» على
مركزك .. واضحة دى؟
نبيه : أنا حاسكت نزولا على رأى الأغلبية فقط .. لكن أرجو
تسجيل اعتراضى على التلميح بإمكان التأثير على
مركزى ..
فرج : أنا حاضش فى الموضوع مباشرة .. ميت حلالة بتواجه
لأول مرة فى تاريخها الحديث وجود اجنبى ..
محروس : هم اتنين فى الحقيقة ..
فرج : ده المقصود .. المهم ان هذا الوجود بيشكل تهديد
لنظام حياتنا .. النظام اللى بيستهدف خدمة الناس
جميعاً .. ودلوقت حادعو حميد يقدم لنا موجز بحثه فى

الموضوع..

فرج : (يتنحنح ويتصنع الأهمية) فى الحقيقة انا راقبت المدعو مكرم والمدعو غريب فترة غير قصيرة.. وفى الحقيقة اشتبكت مع كل منهما فى مناقشات طويلة باعتبارى مواطنا عاديا.

محروس : بلاش النحوى قوى يا حميد.. عشان خاطرى.. أصلى انت عارف..

نبيه : انا اعترض على اللهجة التى يتكلم بها حميد.. اذ إنه حين يقول «كأننى مواطن عادى» يريد فى الحقيقة ان يقول انه مواطن غير عادى.. وهذا يمثل انتهاكا للقانون الاساسى للجمعية الذى ينص على المساواة المطلقة..

فرج : نبيه.. انا حانذك رسميا..

نبيه : وانا ارفض الإنذار..

فرج : أنذك.

نبيه : أرفض..

محروس : يا خوانا كفاية كده أرجوكم.. يا نبيه احنا كلنا بنحب بعض وما نقصدش نجرح بعض..

نبيه : انا عضو منتخب من جميع العاملين بصيد الأسماك فى البلد. ويؤيدنى بالاجماع كل من له..

فرج : (مقاطعا بحدة) احنا دلوقت بنتكلم فى حاجة أخطر من ده كله.. احنا قدامنا مشكلة ما انتش قادر تدرك أبعادها..

نبـيـه : انا حاسكت نزولا على رأى الاغلبية.. لكن لازم اسجل:
اعتراضى على اتهامى الضمنى بالجهل..
فـرج : أرجوك يا نبـيـه كفاية.. اتفضل كمل يا حميد.. من غير
نحوى لو أمكن..
حمـيد : الخلاصة انه إذا كنا نقدر نسيطر على مكرم.. والست
نبوية بتتولى العملية دى فى الحقيقة.. فمش حنقدر
نتخلص من غريب..
محروس : نتخلص منه .. بقول؟
فـرج : الموضوع هو إن وصوله معناه ان السلطات اتنبهت..
معناه ان اسمنا ظهر على الخريطة.. معناه ان اهل
مصر بقم يعرفوا ويسمعوا عن ميت حلاوة.. المسئولين
اللى فى ايدهم البوليس والجيش..
نبـيـه : اعترض على صياغة العبارة الأخيرة.. احنا موش
مجرمين او خارجين على القانون عشان نخاف م
البوليس والجيش..
فـرج : اللى اقصد هو ان الهدوء اللى بيسود حياتنا ممكن
يتاثر لو عرف الناس فى مصر بالتجربة بتاعتنا..
حمـيد : وده اللى بيدعونا للتخلص منه..
محروس : ما يضيع..
فـرج : غلط.. اذا لجانا للطريقة دى يبقى كائنا بنصب زيت ع
النار.. انا فى الحقيقة حضرت خطة لمواجهة تتمشى
مع سياستنا..
نبـيـه : انت بتكلم يا فرج كائنا خفافيش غاويين الضلعة. انا

أعترض بشدة على الإيحاء بهذا..
فـرج : يعنى عاين تعمل ايه؟
نبـيه : احنا تجربة رائدة ولانم ترى النور.. لازم الناس كلها
تشوف نجاحنا وتنبهر بيه وتتعلم منه..
فـرج : كلام جميل.. بس لازم تعرف ان غريب بك راجل
روتينى.. ولا يمكن التفاهم معاه إلا بلغته. ولهذا قررت
أواجهه بالنظرية السادسة..
نبـيه : ممكن يعترض.. لو قلنا له ان احنا ما بتدفعش
ضرائب لأن الدولة لا تؤدى لنا خدمات. ودا صحيح
طبعا - ممكن يقدم لنا أوراق تثبت ان الدولة بتؤدى لنا
خدمات احنا عارفين إنها وهمية ويعدين يطالبنا
بالضرائب وبالطريقة دى يدمر حياتنا..
حميد : الحقيقة كلام معقول..
فـرج : ازاي بس يا حميد؟
حميد : غريب من أمهر موظفى الحكومة..
محروس : النظرية السادسة عبقرية..
فـرج : يا خوانا لازم نقرر..
نبـيه : وناخذ الاصوات..
محروس : وأنا راىى نواجهه..
حميد : راىى ننتظر شوية..
فـرج : يبقى انقسمنا.. الأمر بقى للست نبوية.. صوتها هو
اللى يحسم الموضوع..
نبـيه : إذن نفرض الاجتماع للمداولات الجانبية..

(يدق صنج وتدخل الست نبوية.. الجميع

يلتفون حولها فى رهبة ثم تبدأ..)

نبوية : مكرم خلص مشروع القناة الجديدة.. وتقدرنا

تعتبروا الموضوع منتهى.. أما بالنسبة لغريب فأنا

عايزه أسمع آراءكم..

فرج : احنا اتناقشنا فى الموضوع والنتيجة كانت تمام زى

ما سيادتك توقعتى..

نبوية : كده كده؟.. يبقى لازم نتخذ اجراء حاسم والا الموقف

حيقلت من أيدينا.. أنا فكرت انى أتعامل مع غريب بك

بنفسى.. حد معترض؟

(وجوم وتبادل نظرات حذر وقلق)

أنا عايزاكو تعبروا عن آراءكو بحرية تامة.. اتكلموا..

بس لازم تعرفوا ان القضية اللى فى أيدينا أكبر من

الخلافاات الشخصية.. احنا عايزين وحدة فكرية..

موش عايزين خلافاات فى الراى..

(وجوم)

هيه .. راىكو ايه؟ اتكلموا بحرية.. ايك راىك يا نبيه؟

بلغنى انك كنت غايب فترة طويلة.. بقى لك مدة

ماحضرتش اجتماعاتنا.. يا ترى ايه السبب؟

نبوية : كل خير يا فندم..

نبوية : وراىك ايه فى اقتراح فرج..

نبيه : كل اللى بتصوره هو اننا ننتظر شوية.. نسيب غريب

لحد ما يتأقلم..

نبوية : ورايك فى اقتراح فرج..
نبية : فرج أراؤه متسرة..
نبوية : يعنى لسه معترض على فرج.. يا ترى بينك وبينه ايه؟
انت عارف أن كلنا متساويين هنا.. كلنا بنتمتع
بالمساواة..
نبية : بعضنا بيمتع بمساواة أكثر من غيره..
نبوية : بتحسد فرج على المركز بتاعه؟ والا عايز أملك تانيه؟
نبية : أنا ما عنديش أملك خالص.. كلها أملك الجمعية..
الناس..
نبوية : احنا لا يمكن نقبل تصرفك الحاقد الحسود ده.
(تدق الصنج)
أنا اتخدت قرار بقبول استقالته من عضوية اللجنة..
(يدخل الشرطى عبدالعال)
نبية : أنا ما قدمت استقالة..
نبوية : حد منعك؟
نبية : أنا عضو منتخب من جميع العاملين بصيد الأسماك..
نبوية : يعنى ضامن أصواتهم؟ (تضحك) عبدالعال.. (يدخل
إبراهيم)
أقر يا إبراهيم القرار اللى اتخذه نقابة الصيادين.
إبراهيم : (يقرا) بعد النظر فى سلوك المدعو نبية مرزوق نائب
المنطقة فى الجمعية وبعد أن ثبت للنقابة تغيبه عن
البلدة لفترات طويلة واتصاله بجهات أجنبية وكذلك
حصوله على مساكن متعددة فى ميت حلاوة مما

يتنافى مع المبادئ الأساسية للجمعية.. فقد قررت
اللجنة النقابية فصله من جميع وظائفه..
نبويه : لا يمكن.. مش معقول.. ازاي يا إبراهيم؟
نبويه : سمعت بولدك؟
نبويه : أنا أنكر كل الاتهامات.. أنا برئ..
(يتقدم منه عبدالعال وخلفه رجلان)
عايزين إيه؟ يا نهار موش فايت.. يا ست نبويه
أرجوكي.. اسمعي دفاعي.. اديني فرصة..
نبويه : والله يا نبه أنا ما اتخذتش ضدك أى إجراء . انت
مشكلتك مع النقابة.. انت موش تعرف إبراهيم ده؟
نبويه : دا حبيبي.. النائب بتاعى..
نبويه : ولما حبيبك والنائب بتاعك يقرأ عليك البيان ده. موش
لازم تصدقه؟
نبويه : أرجوكي..
نبويه : أنت مذعور من إيه؟
نبويه : أنا حاضيع.. موش عايز أضيع.. أرجوكي..
نبويه : أنا عارفه انك كنت فى الخارج فى مهمة خاصة
بتسويق الأسماك.. لكن ما كنتش اعرف انك اتصلت
بجهات أجنبية!
نبويه : ما هو كان لازم اتصل بجهات أجنبية عشان أبيع لهم
السمك.. يا ست أرجوكي.. افهميني..
(يتقدم الرجال منه ويحيطون به)
انتو حتودوني فين؟ يا ست ارحميني.. يا فرج. يا

حميد... بحق العيش والملح..
نبوية : حتحصل انتخابات جديدة فى نقابة الصيادين من
القاعدة للقمّة..
نبيه : أرجوكى.. أنا حاضيع.. موش عايز أضيع.
(يخرج به الرجلان ووراءهم عبدالعال)
نبوية : ودلوقت.. مادام عندنا الجراة الكافية لمواجهة
مشاكلنا.. وطالما مافيش خلاف على مبادئنا
وسياستنا.. نبدأ الاجتماع.. لعلكم موافقين انى اواجه
غريب بنفسى؟ (لا أحد يرد) اللى عايز يعترض يقول
بصراحة (صمت) مافيش اعتراض؟ وهو كذلك..
عايزة أخذ رأيكو كمان فى انى أنيب واحد بدالى أثناء
غيابى.. ايه رأيكم؟
فرج : مين؟
حميد : مين؟
محروس : مين؟
نبوية : مكرم.. اتفضل يا مكرم..
(يدخل مكرم - يسود الوجوم وتنزل الستار)
(ستار)

المشهد الثانى

(نفس المنظر - عندما تفتح الستار ترى فرج
قلقا يزرع المسرح جيئة وذهابا ثم تسخل عبلة
فى قلق وتقترب منه فى توتر)

فرج : ايه اللى جابك هنا؟

عبلة : ما تزعلش منى يا فرج؟

فرج : إيه اللى جابك بقول؟

عبلة : والننى ما تزعل..

فرج : وبعدين معاكى بقى؟ انطقى..

عبلة : أصلى.. عايزة أسيبك..

فرج : وهو أنا ماسكك..

عبلة : قصدى.. أسيبك خالص..

فرج : مع السلامة.. غورى..

عبلة : (تنهار باكياً) أصلى بأحب غريب أفندى..

فرج : هيه.. فهمت..

عبلة : من يوم ما اكلمت معاه وأنا عقلى موش قنى راسى..

موش عارفه اتم على نفسى.. ما باكلش.. ما
بانامش..
فـرج : عال عال.. لف عقلك لفندى ده؟ قالك ايه بالطيط؟ قال
حياخدك مصر.. حيسكنك فى شقة فى شبرا؟
عـبلة : والنبي ما قال حاجة.. أنا اللي.. اللي..
فـرج : اللي عينك فارغة.
عـبلة : ما تزعلشنى منى..
فـرج : اسمعى..
عـبلة : انت زعلان منى..
فـرج : لا.. أنا موش زعلان.. انتى بس روجى دلوقت وأنا
حاصلك بعد ساعة.. يالله يا حبيبتي..
(تسير فى قلق متجاهلة كلامه ثم تجلس على
كرسى فى أقصى المسرح)
(فى غضب) انتى سمعتينى والا لا.. (تتجاهله
فيضطر إلى تغيير لهجته) معلش.. أنا عارفك
عنديه.. لكن عشان خاطرى.. بلاش النهارده أرجوكى
روجى وأنا حاصلك على طول..
عـبلة : توعدينى؟
فـرج : بآيه؟
عـبلة : بآنى إذا روجت دلوقت تفسخ الخطوبة النهارده.
فـرج : خلاص.. أوعدك.. يالله بقى..
(تخرج)
(تسمع ضجة فى الخارج وطبل ومزامير

ويدخل المسرح راقصون وراقصات ومغنى
ومغنية)

المغنية : الفرحة اكتملت لينا

والسعد ملا ليالينا

الخابن ضاع وعصابته

والفجر أهو هل علينا

الجمهور : يسقط الخائن.. يسقط الخائن..

المغنى : مبروك يا أهل الجمعية

الخير عم الزراعية

الخابن ضاع وجماعته

قرب نفرح بالزينة

الجمهور : يسقط الخائن.. يسقط الخائن..

المغنية : مين يقدر مين يعادينا

الدنيا أهى ضحكت لينا

طهرنا الصيد وشبابكه

وأهو كاس الحب ساقينا

الجمهور : عايزين نبوية.. عايزين نبوية..

(تدخل الست نبوية)

المغنى : ارقصى يالله انتى وهيه

هنوا أميرة الجمعية

الكل حبايب هايمه

وأيديها كمان فى أيدينا

(تشير نبوية بعد لحظة فيهدا الجميع)

نبوية : ايه دول يا فرج؟
فرج : دول أهل بحرى يا سنت.. خرجوا تلقائيا يعبروا عن
فرحتهم بضياح الخاين..
نبوية : كويس.. ع العموم كفاية بقى.. يالله.. أنا ما عنديش
وقت لازم أروح أشوف الشغل ماشى ازاي فى
القناية.. يالله..

(يخرج الجميع ما عدا فرج)

نبوية : انت بتعمل ايه هنا يا فرج؟
فرج : (ينظر حوله فلا يجد احدا فينهار) نبوية.. حياتى
وعنيه.. بتعمل فى فيه كده ليه؟ أنا عمرى خنتك؟ أنا
عبدك.. ملكك.. خاتم فى ايدك.. شيلينى من صباغ..
وحطينى فى صباغ.. لكن ما تعمليش فى كده..

نبوية : ايه اللى جراك النهارده؟
فرج : أنا حياتى كلها بين ايديكى.. عطيتها لك مرة.. ومستعد
اديهالك تانى.. نبوية.. اسمعيني أرجوكى. أنا بقى لى
مدة موش عارف أنا مين.. ماشى أكلم نفسى فى
الحارة.. مشيت ع التربة زى المجانين أرمى طوبة فى
المية.. أكلم السمك والشجر والحجر..

نبوية : سلامتك يا فرج.. انت عيان؟
فرج : أنا كويس يا نبوية.. عقلى اللى ضاع.. عايز أضيع..
ماعدتش أستحمل..

نبوية : ايه بس اللى حصل؟
فرج : يعنى موش عارفة؟ أنا يوم ما وصلت البلد دى كنت

مغمض زى مكرم.. كنت كتاب مقفول.. ورقة صفرا
بتسأل مين أخذ ده ومين عطى ده.. فتحتى عنيه.. وما
عدتش عايز أعرف غيرك.. حبك صاغنى وخلقنى من
جديد..

نبوية : قصدك إيه م الكلام ده كله؟

فرج : النار يا نبوية.. النار.. أنا عارف ان ده ضد مبادئ
الجمعية.. ضد مبادئ الإنسانية نفسها لكن - (في
خجل) أنا باغير..

نبوية : بتأه؟

فرج : أنا باعترف..

نبوية : بتعترف بأيه؟

فرج : أنا غيران من مكرم..

نبوية : انت عارف انت بتقول إيه؟

فرج : عارف.. باحكم علي نفسى بالضياح.. لكن.. مش
قادر.. مش طابق حد يتجوزك غيرى..

نبوية : انت عارف معنى الكلام ده كويس..؟

فرج : عارف.. وموش قادر.. الليل أصبح جحيم.. والنهار
طريق طويل بيوصلنى للجحيم.. كل ساعة بتفوت
بتقرب لحظة العذاب.. لحظة الضلعة.. لما الشمس
تفيب والاقى نفسى لوحدى وأفكر فيكى.. أفكر..

واتصور إنك مع الملعون - أه - أه.

نبوية : (تلين قليلا) أنا خايفة عليك يا فرج..

فرج : أنا انتهيت.. (بيكى)

نبوية : بعد كل الزمن ده؟ ليه يا فرج؟ ليه تسمح باحساس
دنىء انه يتغلب عليك؟ احنا بشر.. بنى آدمين.. مش
حيوانات.. الاحتكار ده خليناه للمخلوقات الدنيئة..
الديوك اللي بتقتل بعضها عشان الفراخ.. الديب اللي
ما يطيقش حد بقرب من الديبة.. انت إنسان.. انت
أسمى من ده كله..

فرج : (بيكى) عارف.. عارف..

نبوية : ما فيش إنسان من حقه يملك أى إنسان تانى. ازاي
تتصور أن من حقه يملكنى؟

فرج : امتلكينى انتى..

نبوية : لا من حقى ولا من حقه.. ولا من حق أى بشر. إحنا
يوم ما لغينا الملكية الفردية هنا لغينا آخر صلة بتربطنا
بعالم الحيوان.. الكلب هو اللي بيهتم بالأرض بتاعته..
أما احنا فوق ده كله.. احنا بنشترك فى كل حاجة..
وعشان كده لغينا الغيرة..

فرج : نبوية .. أنا جاي أودعك.. أنا عارف إن ضعفى غير
جدير بميت حلاوة.. أنا ماشى.. حاوفر عليكى مهمة
عقابى..

نبوية : بكل أسف موش حتقدر..

فرج : (مذعورا) قصدك ايه؟

نبوية : أنت أصبحت خطر علينا كلها..

فرج : مانا ماشى..

نبوية : مجرد إحساسك بالغيرة دى.. شهوة الامتلاك اللي

اتولدت عندك ممكن تدمر الدنيا كلها..

فـرج : مانا سايبكم..

نبـوية : برضه موش ممكن.. خروجك واتصالك بالاجانب
ممكن يهدد سلام حياتنا. وفي الحالة النفسية اللي
انت فيها دى موش ممكن نضمن انك تقول الكلام
الصح وتشرح الموقف كما يجب أن يكون.. ولهذا
قررت..

فـرج : (يصرخ) أرجوكى.. بلاش..

نبـوية : قررت انك تراقب..

فـرج : بحق حبنا القديم.. بحق الماضى..

نبـوية : الماضى قوة مدمرة.. احنا قوة مستقبلية..

فـرج : (يركع على ركبتيه) أرجوكى.. أرجوكى..

نبـوية : ترجونى يعنى ايه؟ العواطف الغير منطقية دى سبناها
للأطفال.. انت عارف انت بتلعب بايه دلوقت؟ بالنار..
انت عايز تضحى بمصائر الناس عشان عاطفة
سخيفة مالهاش مبرر..

(تدق الصنج فيدخل رجالن مسلحان)

فـرج : حتعملى فيا ايه؟

نبـوية : يوضع تحت المراقبة.. ويوضع كل ما يتصل به تحت
المراقبة..

(يخرج مع الرجلين بينما تعود الموسيقى

والضجيج ويدخل الجمهور والراقصات)

احنا موش قلنا كفاية؟ (تخطر لها فكرة) والا

اسمعوا تعالوا معاً.. حنروح مشوار صغير عند
القناية.. نعبر تعبير تلقائى عن فرحتنا بحفر القناية
الجديدة.. لازم يكون شعورنا تلقائى.. حاقولكم تقولوا
ايه بالضبط وتعملوا ايه بالضبط تلقائياً..
(يخرج الجميع بينما يدخل مكرم وسونة في
تلصص)
مكرم : (داخلا ومشيرا إلى سونه أن تتبعه) تعالى
تعالى.. كلهم خرجوا..
سـونة : أنا خيفة..
مكرم : تعالى بس... لازم أوريكى بعض الأوراق..
سـونة : وأنا أفهم فى الحاجات دى؟..
مكرم : تفهمى ونص.. تعالى..
(يخرج أوراقا من درج المكتب ويربها لسونة)
سـونة : يا خبر. ودا معقول..
مكرم : أدى سر العملية..
سـونة : واحنا ولا واخدين بالننا..
مكرم : المسألة كانت واضحة م الأول..
سـونة : أما انت شاطر بشكل.. يا سلام يا سى مكرم.. أنا ما
باشبعش من قعدتك وكلامك..
مكرم : وأنا باحب أكلمك قوى يا سونة..
سـونة : تكلمنى بس؟
مكرم : اكلمك وأمشى معاكى وكل حاجة..
سـونة : ما عدتش غاوينى يا سى مكرم؟

مكرم : أصل فيه حاجة شاغلانى قوى..
سونة : (بدلال) عارفه..
مكرم : عايز أقول لك عليها بس خايف..
سونة : خايف من إيه؟
مكرم : موش عارف حتقولى عليا إيه؟
سونة : حاقول إيه يعنى؟
مكرم : انتى بتقولى انتى عارفها.. مش كده؟
سونة : قوللى ياسى مكرم.. والنبي..
مكرم : الغنم راحت فين؟
سونة : الغنم؟
مكرم : ثلاث آلاف أربع تلاف رأس غنم.. راحوا فين؟ هه؟
اسمعينى كويس يا سونة.. أنا منكى وعليكى صحيح..
وباحبكى موت وكل حاجة.. بس فيه حاجات - أقول
إيه؟ ازاي كل الغنم دى قدرت تهرب م البلد كدهه؟
سونة : تهرب ازاي؟
مكرم : امال راحت فين؟ ما هى لازم هربت.. بس برضه على
رايك تهرب ازاي؟ وتهرب من إيه؟ ما هى عايشة
مبسوطة بتاكل وتشرب ويتنام ويتخلف وترضع
وتربى.. بتزيد ويتنتشر.. بتغنى.. وتنسبط.. المراعى
قدامها والمية حواليتها والسما صافية فوقها.. تهرب
ليه؟
ما لهاش صاحب يسأل عليها؟
سونة : دى غنم الجمعية يا سى مكرم..

مكرم : ولما الغنم دى بتاعة الجمعية.. ليه الجمعية ما بتدورش عليها؟ ليه ما حدش بيببلغ السلطات؟.. يمكن عندهم طريقة.. اذا كانت اتسرقت يلاقوها.. اذا كانت غرقت يقولوا لنا. بس نعرف ايه اللى حصل..

سـوـنـة : بس ده مش ممكن..

مكرم : ليه..

(تسمع اصوات فى الخارج)

سـوـنـة : حاسب يا سى مكرم..

مكرم : فيه ايه؟

سـوـنـة : موش عارفة.. سامعه حس..

(ينصتـان - يسمع صوت نبوية وغريب فى

ضحك عال)

مكرم : دى نبوية.. وأظن غريب معاها.. تعالى نستخبى هنا فى الأودة دى.. خلىنا نسمع حيقولوا إيه..

(ينصتـان فى الحاجز على المسرح - نحن نراهما

بينما لا يستطيع غريب ونبوية رؤيتهما)

نبـوـيـة : (داخلة) زى ما بقولك..

غـرـيـب : يعنى عايزة تقولى ان الأرض دى موش موجودة خالص ع الخريطة؟

نبـوـيـة : موش بالضبط.. لكن اللى موجود منها عشر اللى موجود فى الحقيقة.. احنا اللى عملناها.. بمجهودنا وجهد أولادنا.. وطبعاً فيه مناطق لسه مرسومة ع الخريطة كجزء من النيل.. ولذلك تلاقى إن الطبيعة

كمان مسئولة عن اللي حصل..
غريب : شئ مذهل..
نبوية : ابدأ.. من كام سنة كده لاحظنا ان النيل بدأ يبعد
ويدينا أرض جديدة.. قمنا أضفناها لميت حلاوة..
غريب : من أمتع ما يمكن..
نبوية : حيث كده نشوف إذا كنا نقدر نسوى عمليات
الضرايب المتأخرة دى.. (تضحك) إذا كان فيه
ضرايب مستحقة علينا صحيح..
غريب : المسألة فيها نظر.. وممكن نتفاهم.. (ينظر فى
الساعة)
نبوية : مستعجل على إيه؟ أه.. لازم عيلة بتستناك.. مبروك..
غريب : مش قادر أصبر..
نبوية : اتحكم فى نفسك شوية آمال.. عيب كده يا غريب بك..
انت ضيف علينا.. ولازم تعرف ان احنا ضد الاثارة
الزائدة.. زى ما انت شايف. الناس مسالمين وهاديين
وطيبين.. بيؤدوا أشغالهم فى هدوء وأمانة.. عمرهم ما
يشغلوا نفسهم بشئون الجمعية..
غريب : شئ مذهل..
نبوية : إيه هو اللي مذهل؟ حيلاقوا منين لجنة عليا تهتم
بشئونهم بالصورة دى؟ توفر لهم الأكل مجاناً تقريباً..
والليس.. والأقراح.. والمغنى..
غريب : اهتمامهم بالفن ملحوظ..
نبوية : دول دايماً يعبروا عن أحاسيسهم بصورة تلقائية.

وعشان كده ما عندناش عواطف إنسانية معقدة.. لا
غيرة ولا كراهية ولا خوف..
غريب : بس ده ضد الطبيعة البشرية..
نبوية : بالعكس.. دا هو ده اللي بيميز الإنسان.. أنا مثلا لا
يمكن أغير ولا اتهم من المشاعر دى.. وموش ممكن
أكره أبدا.. ولا أعرف الحنق والغيرة..
غريب : أنا لازم مختلف..
نبوية : اسمع كلامى.. أنا موش أتجوزت مكرم؟
غريب : فيه اشاعات..
نبوية : لا.. دا صحيح..
غريب : أنا متصور انه..
نبوية : وعارف ان مكرم كان معجب بسونة..
غريب : أهى دى بقى اشاعة..
نبوية : شوف اسمع أما أقولك.. أنا ما حبش حد يعارضنى..
حتى ولو كان عايز يبسطنى (بتهديد) انت غاوى
معارضة من يومك..
غريب : يا نبوية هانم..
نبوية : اتفضل.. عايز تشوف بعينك؟ (تفتح باب الحاجز
على المسرح) تعالى يا مكرم.. تعالى يا سونة..
اتفضل.. كانوا بيعملوا إيه جره؟ (فى حماس
وعصبية) جاوينى.. قول لى.. اتكلم.. كانوا
بيذكروا؟ بيشتغلوا؟ دا مكرم اللي كان مفروض يكون
مع الانفجار عند القناية.. ودى سونة اللي رسميا

متجوزة محروس.. لكن أنا موش غيرانه.. .. إطلاقا..
بالعكس.. المشاعر دى ماتت عندى تماما. (فى هدوء)
اتفضل يا غريب بك.. أنا النموذج الحى لما يجب أن
يكون عليه الإنسان.. الإنسان اللى لازم يسمو على كل
ما يربطه بعالم الإثارة النابعة من الامتلاك.. أنا لا
أمتلك مكرم ولا مكرم يمتلكنى.. (كريشندو إلى
النهاية) حبى له أعمق من الإثارة السطحية.. أعمق
من الغيرة.. من الحنق.. من الانتقام.. وكذلك حبى
لسونة.. لن تؤثر علاقتها مع جوزى على حبى لها.. أنا
باحبه.. وباحبها.. باحبها. باحبها..

«ستار»

المشهد الثالث

(نفس المنظر) (يدخل مكرم حاملا حقيبة
ومتجها إلى الخارج في عزم وخلفه نبوية
تحاول أن تستبقه)
نبوية : أرجوك يا مكرم.. خليك لبعد الاجتماع..
مكرم : مستحيل.. حلاقي الغنم النهاردة يعنى حلاقيها
النهاردة..
نبوية : غنم إيه بس يا مكرم؟
مكرم : حلوه غنم إيه؟ الغنم.. التلات أربع تلاف رأس اللي
هجت.. الغنم يا نبوية..
نبوية : حبيبي..
مكرم : الغنم يا حبيبتى..
نبوية : بحق حبنا..
مكرم : بحق الغنم..
نبوية : انت اتجنتت؟..
مكرم : يمكن.. لكن حلاقيها النهاردة.. أنا قررت أحط إيدي

على السر.. الجمعية مليانة ناس مش أمنا - زى ما
بنقول فى مصر - ناس بيستغلوا لايحة الجمعية
والحلم اللى اتحول لكابوس..

نبوية : (فى جدية مرعية) ما فيش حد عندنا مش أمين.

مكرم : والغنى؟

نبوية : (تلين ثانيا) أرجوك يا مكرم.. احنا لازم نخلص
الاجتماع بسرعة لأن غريب اتجوز عيلة ويدخل الجمعية
وبدا يتصل بناس كثير فى ميت حلالة..

مكرم : ما انتو حتعدلوا اللايحة عشان تسمحوا له بالدخول..

نبوية : أنا عايزاك جنبى يا مكرم.. أنا باحبك..

مكرم : يا نبوية المسألة ما تحتلش التاجيل..

نبوية : مكرم.. أرجوك..

مكرم : نبوية.. ما تقلقيش على..

نبوية : حتغيب..؟

مكرم : سلامو عليكم..

نبوية : (وحدها على المسرح) السرطان اللى بيدمر خلايا

الحياة.. البقعة السوداء اللى بتكبر وتكبر وتكبر..

ومالهاش ظلال.. لو كان لها ظل كنت عرفت إنها

حقيقية.. لو كان وراها نور كنت عرفت إنها ظل..

(تنتبه كأنها وجدت الفكرة الصائبة) تمام..

الخلية الغريبة.. الجسم الغريب وسط خلايا البدن

واللى مفروض يتحارب.. مفروض نحاربه.. نلفظه..

نرفضه.. ومع ذلك بنحبه. بنستسلم له.. بنسمح له

يدمرنا.. خلية ورا خلية.. (منهارة) موش ممكن أنكر..
ممكن أمثل على الناس.. على التاريخ.. وعلى عقلى
حتى.. لكن الحقيقة بتوجع.. جوايا هنا.. فى كل جزء
من أجزاء جسمى.. بتكوى زى النار.. مكرم بقى جزء
منى.. عايش جواى.. مرض.. دمار.. لكن ممتع
وجميل.. أنا مندهشة ازاي قدرت أعيش السنين دى
كلها من غير ما أحس الإحساس ده.. من غير ما
أعرف القوة الغريبة اللى جواى دى.. الكائن الجديد...
لا.. القديم.. اللى كان دايما موجود وغريب على.. أنا
لازم أسأل نفسى النهاردة أنا إيه.. موش أنا مين؟
واحنا كلنا.. احنا إيه؟ موش احنا مين..

(يدخل إبراهيم)

إبراهيم : ست نبوية.. أرجوكى..
نبوية : خير.. يا إبراهيم.
إبراهيم : الرجالة بره موش قادرين يستنوا..
نبوية : خليفهم يتفضلوا..
إبراهيم : سيادتك مرهقة شوية..
نبوية : لا أبدا.. خليفهم يتفضلوا..
إبراهيم : أنا قلت نؤجل الاجتماع لغاية ما سى مكرم يرجع لكن
الرجالة بقى.. كلهم مصممين.
نبوية : (تفقد أعصابها للحظة) عايزين الاجتماع من غير
مكرم؟ من غير الروح اللى بتدينا الحياة.. (صارخة)
هم عارفين مكرم يعنى إيه؟ هم فاهمين القيمة اللى

قدامهم.. الحياة اللى خلقها؟
(صمت متوتر تعود فيه إلى الهدوء)
ومع ذلك.. خليفهم يتفضلوا.. قل لهم يتفضلوا.
(يخرج إبراهيم)
(وحدها) أنا ليه عملت كده؟ ازاي أفقد أعصابى
بالصورة دى؟ وازاي حاواجه ميت حلاوة بعد كده؟
(تجفف دموعها) أنا لازم أقف على رجلى تانى..
وأقوى من الأول.. اللى جواى ده شأتى أنا.. شأن
فرد.. إنسان عادى.. ذات محدودة صغيرة لكن ميت
حلاوة.. الجمعية.. العمل اللى لازم نؤديه..
(تدق الصنح فيدخل حارسان)
قولوا للرجالة يتفضلوا.. الاجتماع حيبداً حالا..
تصلح من هندامها وتعدل
خصلة من شعرها وتنتظر إلى
المرأة فى يدها بينما يدخل
حميد ومحروس وإبراهيم وزقزوق)
حميد : صباح الخير يا ست نبوية.. اتفضلوا يا رجالة.
اسمحي لى أقدم لك..
نبوية : (فى عصبية) عارفاهم كلهم..
حميد : أقصد زقزوق..
نبوية : زقزوق ناصف.. عارفاه.. بتاع الغزل والنسيج..
حميد : أصله.. دلوقت هو الممثل الجديد للنقابة بعد إعادة
الانتخابات..

نبوية : (نفس العصبية) عارفه قلت لك..
إبراهيم : وأنا حاخذ مكان فرج..
نبوية : (نفس العصبية) الناس انتخبتك؟
إبراهيم : بالإجماع..
نبوية : ما فيش حد معارض؟
إبراهيم : أقلية مضللة..
نبوية : قصدك إيه أقلية؟ مين دول؟ ازاي نسمح بكده؟
إبراهيم : (مقدما ورقة) اسماؤهم هنا..
نبوية : حميد... شوف دول وقول لنا إيه رأيك؟ لازم نكون
حاسمين فى مواجهة المعارضة.. الاجتماع بتاعنا
يمكن غير قانونى عشان مكرم موش موجود.. لكن
لازم نتخذ الاجراء المناسب.. (فى قلق) هو مكرم غاب
ليه؟ راح فين بالضبط؟ (إلى محروس) انت مراتك
فين يا محروس؟
محروس : سونة؟
نبوية : ما انتش عارف مراتك فين؟
محروس : لازم فى الغيط..
نبوية : لازم يعنى إيه؟ ما تعرفش مراتك فين؟ (يعلو صوتها
ويتهدج) مراتك بتاعتك.. ملكك.. ازاي نسمح لها..
(تضع يدها على رأسها وتبدو عليها أمارات
الإعياء الشديد).
حميد : سلامتك يا نبوية..
نبوية : لا مؤاخذه.. استمروا انتو.. أنا حابقى كويسه..

(تخرج)

حميد : الست تعبانة شوية..

زقـزوق : (فجأة) لكل إنسان دوره الذى يؤديه بأمانة وهو
ينخرط فى المجتمع الكبير الذى يضم الجماعات
المتباينة..

محروس : انت بتقول إيه؟

زقـزوق : دى حته من لايحة الجمعية..

حميد : وده وقته برضه؟

زقـزوق : أنا حافظ اللايحة صم...

محروس : برافو عليك..

زقـزوق : ممكن أدلى بدلوى فى الدلاء؟

حميد : عايز تقول إيه؟

زقـزوق : اسمحوا لى با اخوانى إنى اتكلم بصفتى عضو
وارجو أن تنبهروا لسعة علمى واطلاعى.. أنا موش
شوية زى ما انتو عارفين.. صحيح أنا عامل نسيج
بسيط.. ولكن بجدى واجتهادى وحفظى للائحة وصلت
للعضوية وبصراحة الدنيا موش سايعانى من
الفرحة..

محروس : خش فى الموضوع..

زقـزوق : أنا راىى ذو شقين.. (متلذذا) عظيمة كلمة شقين دى..

محروس : أرجوك يا زقزوق.. أنا موش فاهم حاجة أبدا..

زقـزوق : أولا.. لابد من القضاء على الأغراب اللى هم سبب
المشكلة.

حميد : ما عدش عندنا أغراب.. مكرم أفندى اتجوز الست نبوية وبقي واحد مننا وغريب بك اتجوز عبلة وأصبح عضو عامل..

زقزوق : آمال احنا مجتمعين ليه؟

حميد : عشان نعدل اللايحة..

زقزوق : لا يمكن تعديل اللايحة.. وإذا كانت الست نبوية تصر على هذا فسوف أعارضها.. بقي أنا بعد ما حفظتها تيجوا تعدلوها؟ لا يمكن.. أنا حاقول لغريب بك.. أنا بصراحة اتناقشت معاه وأنبهرت بعلمه زى ما أنبهر هو بعلمى.. واعتقد أن إبراهيم بيشاركنى هذا الراى..

إبراهيم : تمام.. تمام.

زقزوق : أنا ملاحظ ان الست نبوية سمحت لنفسها بعواطف دنيئة زى الغرام والغيرة والغيظ.. (بتلذذ) كلمات تبدأ بحرف الغين..

محروس : قصدك إيه؟

زقزوق : قصدى إنها عواطف دون مستوى الجمعية وضد اللايحة.. ازاي نسمح بأن ده يحصل فى ميت حلاوة؟

حميد : انت بتتكلم كلام مالوش معنى..

زقزوق : بالعكس.. ده من اللايحة رأسا..

(يدخل غريب لاهثا)

غريب : لا مؤاخذه يا رجالة.. ممكن إبراهيم شوية؟

حميد : ممكن إيه؟

غريب : بيجى معاى للدكتور.. أصل عبلة عيانة خالص.. نقلتها

لفوق م الباب الورانى..

حميد : اتفضل..

(يخرج إبراهيم وغريب)

زقـزوق : العلاج الجانى من حق الجميع فى المجتمع الذى تسوده العدالة والرفاهية..

حميد : انت يا بنى اسطوانة؟

زقـزوق : يعنى إيه؟

حميد : يعنى بتلف تسمع كلام ما انتش فاهمه.. انت عارف

اللى بيحصل فى ميت حلاوة النهاردة؟ القلق اللى

احنا شايفينه على وش الناس.. الكلام اللى بدأوا

يرددوه من غير ما يفهموه الضرايب والملكية والفلوس

والجاجات دى كلها.. حاولنا سنين نجنبهم الكلام

الكبير اللى مامنوش فايده.. لكن بكل أسف.. انت

وأمثالك حخريوها..

زقـزوق : أنا وأمثالى؟

حميد : انت وأمثالك من أنصاف المثقفين..

زقـزوق : أنا نصف مثقف؟ نصف؟

حميد : فيه حاجة حصلت يا خوانا موش ممكن تنتهى على

خير.. العواطف اللى انت بتتكلم عنها كان ممكن

القضاء عليها لو ما كانتش الناس اتعلمت الكلمات

الكبيرة بتاعتك دى..

زقـزوق : الكلمات دى روح الجمعية..

حميد : وهاكها.. حتموتها..

محروس : عبلة؟ بعد الشر..
حميد : عبلة ايه يا محروس..؟ مرض عبلة ده تمثيل فى تمثيل..
زقزوق : كذب يعنى..؟
حميد : تمثيل.. عبلة عايزه تاكد لنفسها مكان فى البيت ده..
زقزوق : من حقها.. دا بيت الشعب.. بيت الجمعية.
حميد : وهى من الشعب.. مجرد ما دخلت واستقرت خلاص..
مستحيل حد يقدر يطلعها.. وغريب عارف انه لو استقر هنا معاها ومع الست نبوية ومكرم حبيجى اليوم اللى يبلع فيه الجمعية.. الراجل ده تعلق.. بقى انتو فاكرين إنه مقتنع انه مافيش علينا ضرايب؟ غريب فهم الفولة من أول يوم..
زقزوق : قصدك إيه بالفولة؟
حميد : حاجات فوق عقلك.. لأنها موش فى كتاب.. دلوقت يرجع إبراهيم وغريب والست نبوية يطمنوننا عليها..
تأكدوا من كده.. أنا عايش طول عمرى فى ميت حلاوة وفاهم الناس كويس.. غريب موش بس عايز يخش معانا.. دا عايز يستقر هنا..
(يدخل غريب وإبراهيم)
غريب : الحمد لله.. الأزمة فاتت..
إبراهيم : أنقذناها..
محروس : جيتو الدكتور؟
إبراهيم : ما كانش فيه لزوم للدكتور..

حميد : يعنى بقت كويسة وتقدر تروح؟
غريب : لا لا لا لا لا.. موش ممكن ننقلها دلوقت.. عايزالها وقت
طويل فى السرير.. فى أودتنا فوق..
حميد : هى دخلت م الباب الورانى وسكنت فى أودتكم؟
زقزوق : السرعة الفائقة التى تماثلت بها للشفاء تؤكد صدق
حدسنا وتدعونا إلى تأمل العلاقات المتكافئة فى
المجتمع المثالى..
حميد : والله انت فلقتنى يا زقزوق..
زقزوق : أحتج..
حميد : والسبب فى؟
غريب : جاية على طول..
زقزوق : أفلا يدعونا هذا إلى احتفال تلقائى من جانب
الجمهير؟ أنا اتخذت قرارا أرجوكم توافقونى عليه..
بكره نخليه عطلة رسمية احتفالاً بشفاء السيدة عبلة.
(يدخل مكرم)
مكرم : فىن نبوية؟
إبراهيم : حانده لها حالا
(يخرج إبراهيم)
مكرم : ما خلصتوش الاجتماع؟ كويس.. أنا عايز أقول لكم
حاجة مهمة جدا.. أنا لفيت على رجلى لما دابوا..
ماخلتتش منطقة إلا زرتها.. ماخلتتش بنى آدم إلا
وكلمته.. كنت بادور على حاجة عكرت على حياتى هنا
وفى كل مكان..

محروس : هيه.. سبع والا ضبع..؟
(تدخل نبوية ووراعها غريب)
مكرم : نبوية .. حبيبتي..
نبوية : اتأخرت يا مكرم..
مكرم : وحشتيني قوى..
نبوية : قلقت عليك خالص..
مكرم : نبوية .. اسمعيني كويس..
(زقزوق ينحاز هو وإبراهيم إلى جانب غريب
بينما يدخل الرجال بالتدريج ويقفون خلفهم)
وانتو كمان.. اسمعوني كويس.. أنا لقيت الغنم..
غريب : مجنون..
نبوية : (تبكي) لا يا مكرم لا.. ما تقولش كده..
غريب : مكرم اتجن..
(الرجال يرددون.. اتجن اتجن)
مكرم : (صائحاً) لقيتها بقول لكم.. فهمت الفولة.. عرفت اللى
فيها..
غريب : مكرم اتجن.. ولازم حسب اللايحة يوضع فى
الحجز..
نبوية : مستحيل.. مكرم مش ممكن يتحجز..
غريب : اللايحة صريحة..
نبوية : مكرم حبيبى.. مستحيل.. مستحيل..
غريب : لازم نطبق اللايحة.. وبصفتى عضو عامل لازم أصر
على تطبيق لايحة الجمعية بحذافيرها..

نبوية : مش على مكرم.. أنا لا يمكن أسمع..
غريب : وفي نفس الوقت.. وإزاء العواطف السخيفة..
زقزوق : العواطف الدنيئة..
غريب : العواطف الغير منطقية التي تملك الست نبوية.. وفي الحقيقة أثرت على إدارتها للجمعية لفترة طويلة..
وأدت إلى التخبیط الشديد..
(وجوم)
ليه فرج ما يضيعش؟ ليه يوضع فقط تحت المراقبة؟
بمجرد انتهاكه للائحة الجمعية كان لازم يضيع..
لكن.. يا اخوانى نرى أنه وضع فقط تحت المراقبة..
ليه؟ لأن العواطف دى نفسها تدخلت..
الجمهور : يعيش غريب بك..
غريب : كنت بأقول أنه إزاء العواطف اللى بتفسد نظام الجمعية.. وسوء الإدارة المتفشى فى كل مكان.. فأنا اقترح عزلها..
زقزوق : وأنا أؤيد الاقتراح..
إبراهيم : غريب بك أقدر واحد على الإدارة..
الجمهور : يعيش غريب بك.. يعيش غريب بك..
(تلتصق نبوية بمكرم وهو يجفف دموعها)
غريب : وإزاء هذا التحول الجميل.. سنعقد اجتماعا فى بيت الشعب غدا للنظر فى شئون الجمعية وتطبيق اللائحة تطبيقا حرفيا..
زقزوق : (يصفق) برافو.. برافو..

إبراهيم : يعيش غريب بك.. يعيش غريب بك..

الجمهور : يعيش.. يعيش..

مكرم : (يوجه الكلام إلى الأشخاص واحدا واحدا)

حتعمل اجتماع يا غريب بك؟ وانتى عزلوكى يا نبوية؟

لسه بتحفظ فى اللايحة يا رقرزوق؟ وانت بتسقف ليه يا

إبراهيم؟ وانت محتاس يا حميد؟ اعملوا اجتماع..

اعزلوا.. ضيعوا.. لكن أنا لقيت الغنم.. سامعيني؟؟

لقيت الغنم..

«ستار»

الفصل الثالث

المشهد الأول

(نفس المنظر فى الفصل الأول - الساحة - كل
شئ لم يتغير إلا أن رفوف الجمعية التى كانت
مزينة بالسلع أصبحت فارغة والسلع
المكدسة خارج البوابة لم تعد موجودة. سونة
تمسك بقفص فى يدها وتحافظ عليه وهى
تسير إلى جوار محروس ثم تضع القفص فجأة
وتستوقف محروس وتشده من ذراعه).

سـونة : أنا رايحاله يا محروس..

محروس : احنا موش انتهينا م الموضوع ده خلاص..

سـونة : غيرت رأيى..

محروس : والله ذنك على جنبك.. انتى عارفه القواعد الجديدة
اللى حطها غريب بك..

سـونة : ولو..

محروس : ولو يعنى ايه؟ عايزه تتحبسى انتى كمان فى أودة
ضلمة.. ويدخلو لك الاكل من طاقة فى الباب؟

سـوـنـة : وانت يهون عليك مكرم أفندى يتحبس الحبسة دى
شوف كام شهر دلوقت؟
محروس : موش هو اللى اتجنن؟ يعنى كان حد غصبه يقول الغنم
وموش الغنم..؟
سـوـنـة : مكرم ما اتجننش يا محروس.. دول تاهمينه ظلم..
محروس : (مصعوقا) معنته ايه الكلام ده..
سـوـنـة : كلام ايه؟ أنا قلت حاجة..
محروس : قلتى تاهمينه وقتلى ظلم.. حصل والا لا..؟
سـوـنـة : انى؟
محروس : امال انى؟
سـوـنـة : يمكن موش واخده بالى..
محروس : لا يا شيخه؟ هو احنا عندنا هنا فيه ظلم؟ انتى موش
عارفه ان احنا مجتمع العدل؟
سـوـنـة : قوى قوى..
محروس : وما فيش حد حدانا يتظلم واصل؟
سـوـنـة : قوى قوى..
محروس : امال ايه ظلم دى.. وتاهمينه كمان؟..
سـوـنـة : ما اعرفش..
محروس : جيتى الكلام ده مئين؟ مين اللى علمهوك؟
سـوـنـة : علمنى ايه؟
محروس : مين اللى حط فى بلك الكلام الغريب ده؟ هه؟
سـوـنـة : انت عايز تقول ايه بالطبط..؟
محروس : الكلام اللى بتقولىه ده كلام خطير..

سـوـنـة : (فى رباطة جاش وحسم) ولازم أعاقب عليه؟ ولازم
اتسجن زى مكرم.. والا يمكن يتحكم على بالضياح؟
محروس : أنا ما قلتش كده أبدا..
سـوـنـة : لا.. قلته.. فى لحظة واحدة حسيت انك مستعد ترمى
مراتك حبيبته.. اللى بتحبها وبتحبك.. عشان شوية
كلام مالوش معنى..
محروس : (مذهولا) بتحبينى؟ بتحبينى يا سونّة؟
سـوـنـة : كل ده وما انتش عارف؟
محروس : ومكرم؟
سـوـنـة : مكرم ايه يا محروس؟ مكرم ده أخ وأكتر من أخ.. أنا
حبيبته زى ما الناس كلها ما بتحبه.. وزى ما يحب
الناس.. وزى ما انت نفسك بتحبه..
محروس : مكرم مجنون..
سـوـنـة : مكرم أول العاقلين.. انت صدقت صحيح انه مجنون؟
(تحتضنه فى حنان) يا محروس يا حبيبى.. انت
خايف من غريب بك؟ خايف من مجلس الادارة الهزؤ
اللى انت عضو فيه؟ خايف تضيع؟
محروس : أنا.. بصراحة ما عدتش فاهم حاجة أبدا..
سـوـنـة : بالعكس.. انت بدأت تفهم كل حاجة..
محروس : موش عارف أصدق مين وأكذب مين؟ طول عمرى وأنا
مصدق اللايحة والنظام اللى عملته الست نبوية..
ودلوقت لما الست نبوية مشيت.. لما وقفت جنب مكرم
ضد اللايحة.. موش عارف. يا ريتنى ما كنت عضو

فى مجلس الإدارة.. كنت عايش فى حالى وميسوط!
 سـوـنـة : ما حدش ممكن يعيش فى حاله زى ما انت فاكـر.. لا
 أنا ولا انت ولا اى حد.. ازاي تتصور ان ده ممكن
 وكل يوم ناس بتضيع وحاجات بتضيع.. وغنم
 بتضيع..
 محروس : هي حاجة غريبة صحيح ان ثلاث أربع تلاف راس غنم
 تضيع..
 سـوـنـة : انت نسيت نبيه؟ نسيت فرج؟.. حبيبك؟
 محروس : فرج؟
 سـوـنـة : فرج.. راح فين؟ ننبه ايه؟ حد عرف عمل ايه؟
 محروس : بيقولو انه بيغير..
 سـوـنـة : وانت موش بتغير؟
 محروس : أنا موش ممكن أغير..
 سـوـنـة : لا بتغير..
 محروس : ما بغيرش..
 سـوـنـة : موش بتغير على مراتك؟ أم محروس الصغير؟
 محروس : (مصعوقا) هو انتى؟.. قصدى.. صحيح والنبي؟
 سـوـنـة : (تحتضنه) انت ما كنتش تعرف..
 محروس : (فى سعادة غامرة) ما قتلتيش ليه قبل كده؟
 سـوـنـة : يا حبيبى..
 محروس : يبقى باغير..
 سـوـنـة : وتبقى بتحب..
 محروس : أعترف..

سـوـنـة : عارف أنا أول ما عزفت.. قررت انى أهج..

أسبب ميت حلاوة وأعيش فى حته تانيه..

محروس : عايزه تسيبيني يا سونة؟

سـوـنـة : مستحيل.. أنا لا يمكن أسببك..

محروس : حتروحى مصر؟

سـوـنـة : مش حاروح اى حته.. أنا بس فكرت أهج.. ويعدين

لقت ان على واجب لميت حلاوة.. كنت خايفة محروس

ابنى يطلع واحد م اللى بيسقفوا ويطلبوا ويزمروا..

محروس : انتى نكية قوى يا سونة..

(يخرج رجالان من مبنى الجمعية ويصرخان فى

محروس)

رجـل ١ : هى الرفوف فاضية ليه؟

رجـل ٢ : مافيش حته قماش الواحد يفصلها؟

رجـل ١ : حته دبلان على قد الحال..؟

رجـل ٢ : ولا دمور يا أخى..؟

رجـل ١ : احنا حنروح لغريب بك..

رجـل ٢ : موش ممكن يرضى ع الحال ده أبدا..

(يخرجان)

محروس : كلام مكرم..

سـوـنـة : كان ممكن اى واحد فينا يبقى مكرم.. وانت نفسك

لسه سائل السؤال بتاعه.. مكرم اتحبس عشان قدر

يقف فى وش الجمعية ويسأل السؤال ده.. ما خافش..

ورغم ان غريب بك بيخوف أكثر من نبوية.. فيه ناس

كثير برضه بتسال السؤال ده من غير خوف.. (فى
حزم) اسمع يا محروس.. احنا لازم نروح نواجه
غريب بك دلوقت.. لازم نشوف مكرم ونكلم غريب بك..
محروس : القواعد الجديدة..
سـوـنـة : انت خايف منه؟
محروس : أصل القواعد اللى حطها غريب بك..
سـوـنـة : انت لسه عضو فى مجلس الإدارة ومن حقك تواجهه..
ياللا بينا..
محروس : مش رايح..
سـوـنـة : حتروح..
محروس : ما أقدرش..
سـوـنـة : لا.. تقدر..
(يدخل رجلان فى قلق وعصبية)
رجـل ١ : الناس كلها ملمومة عند بيت الشعب..
رجـل ٢ : الناس بتنادى على غريب بك..
رجـل ١ : لازم تروح لهم يا محروس..
رجـل ٢ : دول عاملين اجتماع وعازينك.. (يخرجان)
(تدخل سيده مسرعة وتخطف القفص الذى
وضعتة سونة إلى جوارها).
سـوـنـة : (تمسكها) على فين يا ست انتى؟
السيدة : قفصى..
سـوـنـة : لا يا شيخة؟ دا موش قفصى يا محروس؟ موش
قفصى يا حميد؟ موش قفصى يا رجاله؟ (تنزعه)

منها ثانية)

(همهمة عامة)

محروس : عال عال.. من امتى فيه حاجة اسمها قفصى
وقفصك؟ احنا موش قلنا الف مرة إن كل حاجة بتاعة
المجتمع.. الناس؟

(يدخل الناس واحدا بعد الآخر)

بقى اسمعوا كلكوا. صحيح الحاجات شاحه شوية
اليومين دول.. لكن طول عمرها بتشع وترجع تزيد..
صحيح فيه ضيق شوية.. لكن ده فى انتظار المحصول
الجديد.. ويعددين انتو بتلوموا الجمعية ليه؟ زى ما
غريب بك قال.. لوموا نفسكوا عشان الإنتاج ما زادش
كما يجب.. غريب بك راجل مثقف..

(فجأة تسمع دقات الطبول والمزامير وتدخل

الراقصات تقودهن مغنية وخلفها فتيات يرددن

المقاطع)

المغنية : مبروك يا ولادنا وعقبالنا..

الخير أهو زاد.. زاد فى جمالنا

مبروك.. مبروك.. يا ولادنا

السعد أهو بيهل علينا

بينور أرضنا وسمانا

الكل ينول اللى قسم له

ولا حد بيبطر ويبطرم

مبروك يا ولادنا وعقبالنا..

(محروس يصيح فى الجميع فيصمتون)

محروس : ايه اللى جابك انتى وهيه؟ مين اللى بعتكو.. انطقوا.
سـوـنـة : غريب بك يا محروس.. مش سامعهم بيقلوا راضيين
بنصيبنا وأحوالنا؟

المغنية : راضيين بنصيبنا وأحوالنا
وجنفضل شاكرين للمولى
هو اللى خلقنا ووهبنا
مين يقدر يفهم مقصوده
مبروك يا ولادنا وعقبالنا
شايقين الأنوار بتلالى
ويلدنا الزين صوتها عالى
قمنا غنينا ورقصنا
مبروك يا ولادنا وعقبالنا
محروس : (صائحاً) كفاية بقى.. كفاية..

(يطرد الراقصات)

(يدخل رجلان فى عصبية)

رجل ١ : غريب بك ضاع:
رجل ٢ : ما حدش قادر يعتر عليه واصل!
رجل ١ : من ساعة ما بعث الإخبارية!
رجل ٢ : ضاع يعنى ضاع!
(همهمة بين الجمهور)
محروس : مين اللى قال الكلام ده..
رجل ١ : ده صحيح يا محروس أفندى..

رجل ٢ : صدقنا يا محروس أفندى..

(يدخل حميد)

حميد : فين الست نبوية؟ أنا قتلها تحصلني على هنا..

(نبوية تدخل خارجة من الدكان)

نبوية : انتى هنا بتعملى ايه؟

نبوية : بافكر يا حميد..

حميد : تانى؟! هى دى عايزة تفكير؟

نبوية : عايزة تفكير وتديير يا عم حميد.. (فى نبرات

متعبة) اصرف الناس دول يا محروس.. (محروس

يصرف الجمهور) أنا بقى لى أيام وليالى مش قادرة

اتلم على نفسى.. ولأول مرة بعد شهور قدرت أعمل

اللى طول عمرى باحلم بيه..

حميد : انتى تعبانة يا نبوية؟

نبوية : بالعكس.. أنا حاسه بأن التعب راح للأبد..

حميد : عارفة ان غريب ضاع؟

نبوية : ودى مهمة فى إيه؟

حميد : ازاي بقى؟

نبوية : غريب بك يا حميد فقاعة على السطح.. كان لازم

تفرق.. ان ما كانش النهاردة يبقى بكرة.. سحابة

مالهاش ظلال لكن المهم هو احنا.. أنا وانتو

والجمعية..

حميد : ما احنا حنعدل اللايحه..

نبوية : (تضحك) ونستمر زى ما كنا؟! (تضحك) مستحيل!

(تتردد) والا ممكن؟! واذا كان ممكن يبقى ازاي؟!..

دا اللي كنت بافكر فيه!

(سونة ومحروس يقتربان منها فى حذر)

سـونة : هو سى مكرم لسه فى الحجز..؟

(منفجرة) ما اعرفش.. ومش عايزة اعرف.. (تضع

رأسها بين يديها) مـخى حينفجر.. أنا باحب مكرم..

مكرم جوزى وحبيبي.. (فجأة والجمعية؟! واللايحة؟!

والمجلس؟! وميت حلاوة؟!

محروس : المبادئ يا ست نبوية..

نبـوية : (مقاطعة) المبادئ! مبادئ مين؟ اسمع يا محروس..

سونة.. حميد.. أنا حاسه ان جواى حاجات لأول مرة

بتتفتت.. بتتقطع.. أنا حاسة انى ما عدتش قادرة

استمر.. ولا حتى كامراة.. كزوجة لرجل مخلص..

سـونة : أنا فاهماكى كويس يا ست نبوية.. أنا كمان..

نبـوية : لا يا سونة.. انتى لسه صغيره.. أنا عشت عمر كامل

اشتغل عشان اشوف بناية كبيرة جميلة.. حلم جميل

بيتحقق.. ولما قرب يتحقق.. لما قربت أقول انى حققت

حلم حياتى.. انى باشوف قدامى كل اللي حلمت

بتحققه.. (صمت وتوتر) حصل.. ايه اللي حصل؟!

(صمت) مكرم!

سـونة : الحب أصله..

نبـوية : موش الحب يا سونة.. الإنسان!

محروس : (فى حذر) زى ما اللايحة.. اللايحة..

نبوية : الالاحة دى نكتة بايخة يا محروس.. أنا حاسة ان
احنا خلقنا وحش أكبر منا.. أكبر من الإنسان اللى
جوانا.. واللى أخطر من كده ان احنا صدقناه..
سمحنا له يلتهمنا..

محروس : (فى تردد) بس احنا نجحتا فى.. نجحتا فى اتنا..
نبوية : (فى ذهول) فى اتنا نلغى قلوبنا؟ فى اتنا نسمع
للأراجوزات انهم يلعبوا بالآلفاظ الكبيرة ويحولوا كل
اللى حاولنا نعمله لنكتة.. مسرحية هزلية.. (فجأة
إلى محروس) انت عارف ان إبراهيم دلوقت هو اللى
أخذ مكان غريب..

محروس : ما هو غريب.. أصله غريب بك..

نبوية : أصله كان أخذ مكان فرج..

محروس : ما هو الالاحة..

نبوية : لا يا محروس.. موش الالاحة.. احنا.. الوحش اللى
خلقناه.. عارف بيعملوا ايه فى الاجتماع دلوقت؟

(يندخل رجلان يهرولان)

رجل ١ : اللمة جاية م السوق..

رجل ٢ : إبراهيم أفندى جايب الجماعة وجاى..

رجل ١ : الاجتماع يحصل هنا..

رجل ٢ : والظاهر عايزين يرجعوكى يا ست نبوية..

(يخرجان)

نبوية : (تنخرط فى الضحك) يرجعونى! فىن؟ ويرجعونى
على أساس ايه؟ (جادة) عارف باعتين يقولولى ايه..

(تقرا من ورقة) «نحن مستعدون ان نغفر لك مشاعر
الحب والغيرة والتملك والسيطرة باعتبارها هفوة لن
تعودى لها.. وهكذا تتركين مكرم فى موعد أقصاه
آخر هذا الشهر..» سامع؟

حميد : دا كلام زقزوق..

محروس : أصله حافظ الالاحة صم ويحب يسمع تحت منها كل
شوية..

حميد : أنا عارف انه كتب خطابات دورية لكل واحد..

محروس : أنا ما وصلنيش..

سـوـنة : لا.. وصلك بس أنا قطعتة..

محروس : بيهددنى..؟

سـوـنة : لا.. بيشرط عليك تسيبنى فى موعد أقصاه..

نبـوـية : إبراهيم عين زقزوق مستشاره القانونى! إبراهيم بقى
بيتكلم عن مبادئ الجمعية.. وعن شروطه على نبوية!
انتو جرالكو ايه يا ناس؟ احنا جرى لنا ايه كلنا؟

(هرج ومرج - يدخل الشاعر وخلفه الجمهور
ووراءهم إبراهيم وزقزوق وظريفة)

(لحظة توتر وبعدها يبدأ إبراهيم فى الحديث)

إبراهيم : أنا موش حاطول.. أنا بس حاشرح الظروف اللى أدت
إلى التغيير فى ادارة الجمعية.. وبعدين حاسمح
للزملاء انهم يلقوا كلمات.. زقزوق.. ومراته ظريفة..
ومحروس وسونة.. وكلهم.. اتفضلوا يا اخوانى..
اتفضلوا (يلحظ نبوية) انتى هنا يا نبوية..؟ أنا

يمكن أفرج عن مكرم قريب.. اتفضلوا.. اتفضلوا..
زقزوق : عايز القى كلمة فلسفية عميقة..
إبراهيم : اتفضل يا زقزوق.. بس ما تطولش..
زقزوق : (متنحنا) يا أيها الناس.. الفوضى التي كانت
تضرب أطنابها في الأرض.. (فى تلذذ) حلو التعبير
ده.. تضرب أطنابها.. تضرب ايه؟ قولوا معاً..
تضرب ايه؟
إبراهيم : (صارخا) خش في الموضوع..
زقزوق : أطنابها.. الفوضى التي كانت تسود الجمعية قد
انتهت وبدأنا عهد الرخاء الحقيقي.. كانت الخيرات
تعم الجميع في الماضي بينما يسود الفقر في حقيقة
الامر وواقع الحال..
إبراهيم : كفاية يا زقزوق..
زقزوق : مرأتى عايزة تسمع الفصاحة..
إبراهيم : كفاية قلت لك.. اتفضل.. أنا حاتكلم..
(لا أحد يصفق فيشير إلى أحد الواقفين
فيصفق ومعه اثنان أو ثلاثة)
الموضوع وما فيه انه حصلت انحرافات في تطبيق
اللائحة.. اللائحة بتقول مثلا ان اللي بيخدم في
مجلس الإدارة لازم يعمل في أفضل الظروف..
(يصرخ) دا كان بيحصل؟ قطعاً لا.. ليه؟ لانهم لم
يتمتعوا بالمسكن الملائم.. النهاردة كل واحد في
مجلس الإدارة عنده مسكن فاخر ووسائل انتقال

سريعة.. كل واحد فى مجلس الادارة بقى عنده كارتة
سويه (يشير إلى نفس الرجل ليصفق ومعه
قليل من الناس)

.. لكن الانحرافات مستمرة! مثلا.. بلغنى انه فيه ناس.
رجالة وستات (مشيرا إلى نبوية وسونة
ومحروس) بيرفضوا يسيبوا أزواجهم.. بقى ده
كلام؟.. أى مصادرة لحرية الإنسان.. أى كبت لمشاعر
البشرية.. أى احتكار وأى استغلال..

(يشير إلى نفس الرجل ليصفق ومعه القليل)
بدأنا نرى مظاهر التدخل فى شئون الجمعية.. دا
بيقول الحاجات بتضيع (مشيرا إلى حميد) وده
يقول انتوا عملتوا ايه؟ ومظاهر الملكية الفردية.. ده
يقول ده بتاعى دى بتاعى (مشيرا إلى سونة)..
واحتكار بعض الفلاحين لبعض الاراضى اللى
بيزرعوها.. الكلام ده لازم ينتهى.. اللايحة صريحة..

زقزوق : ممكن اسمع حته من اللايحة؟

إبراهيم : استنى يا زقزوق..

زقزوق : مرأتى ظريفة نفسها تسمعى..

ظريفة : ممكن أتكلم؟

إبراهيم : اتفضلى.. تصفيق..

ظريفة : ابنى تعبان جدا فى المدرسة.. ليه ما نختصرش
الدراسة؟ ونلغى دكتاتورية المدرس اللى بيتحكم فى
مصير العيال بجرة قلم؟

إبراهيم : كل دى أفكار نيرة.. حنبطل حشو أذهان التلاميذ بالمعلومات

ظريفة : الذهن النضيف أحسن من المحشى..

إبراهيم : لازم العيال يصلحوا أوراقهم بنفسهم.. كفاية تسلط وسيطرة وصاية.. ودا يقتضى تعديل البطاقات لمنع التبذير فى أموال الجمعية اللى هى أموالنا جميعا.. لازم كل واحد يرضى بأقل م اللى بينوله.. حسب اللايحة.. واحنا ناخذ الباقي.. لأنه لا يمكن انعاش الريف دون انعاش مجلس الإدارة!

(يتسرب الناس أثناء الخطاب إلى الخارج)

عب عال! الناس دى راحت فين؟ رجعم يسمعو بقية الخطاب..

(يخرج عبدالعال ويعود ومعه عدد من الشرطة يسوقون بعض الناس ويمنعونهم من الخروج)

أنا كمان ملاحظ أن فيه ناس ساكتين.. كان لازم أعرف أن فيه فئة موش عايزة تتعاون معاى.. ع العموم أنا حاعقد اجتماع فى بيت الشعب لمناقشة هذا الموضوع.. خلاص.. انصراف..

(يتفرق الجميع).. (يبدأون الخروج واحدا بعد الآخر)

الشاعر : الساقية بتدور تفضى وتملا

والدنيا أحوال شوف ازاي عاملة

يوم انت فوق.. يوم عند القمر
يوم انت تحت ويوم حترجع فوق
والطور ييمشى عمره ما بيغوق
الطور ييمشى فوق دماغه فله
واحتنا وراه بنغنى.. بنهاله
صعبان علينا بس ايه نعمل له
حيوان كريم قلبه على الإنسان
قام الفتوة قال له بطل جر
قال أعمل إيه.. البير غميق مسحور
لازم أملا ميه.. لازم أفضل أدور
مكتوب على.. دا قدر مقدور..

(يعود الشاعر إلى تحريك شفتيه دون صوت)

بينما يسير حميد إلى مقدمة المسرح)

حميد : شوف الحلم لما يبقى كابوس.. على رأى مكرم.. بس هو
طول عمره حلم موش معقول.. حلم زى الكابوس..

محروس : أنا خايف يا عم حميد..

سـوئـة : وأنا يا عم حميد..

حميد : خايفين صحيح؟ خايفين من إيه؟ من أراجوز زى ده؟

نبـوـية : (فى ثبرات رزينة) لهم حق يا حميد..

حميد : وانتى كمان يا نبوية؟! انتى حتضعفى يا نبوية عشان
أفندى لا راح ولا جه..

نبـوـية : اخرص! مكرم سيد الرجال..

حميد : واللى بنيناه! كل اللى عملناه سوا.. سنين وسنين..

عائزه تهدميه فى لحظة؟! الجهد والعرق.. الكلام والمبادئ والحواديت الطويلة؟! خلاص؟!
نبوية : أنا باعترف انى غلطت.. (فى انهيار) واتخذت..
حميد : متأسف.. فأت الوقت للندم.. أنا بعت الإخبارية من يومين.. من قبل ما نضيع غريب.. والجماعة زمانهم جايين..
نبوية : (تصعق) الجماعة؟
حميد : (صارخا) أيوه الجماعة.. خليبها تخرب باللى فيها بقى.. أنا غلطان اللى تصورت ان واحدة ضعيفة ممكن تكبر وتشاركنى حلمى العظيم..
نبوية : عملت كده ليه يا حميد؟! (تتهاوى شبه مغمى عليها)
سـونة : (تهرع إليها فى لهفة) ست نبوية.. سلامتک ألف سلامة..
محروس : حاجيب لها ميه.. (يخرج)
سـونة : (يعود بالماء)
سـونة : سلامتک يا حبيبتي.. (تروح على وجهها وتحاول إفاقتها).
حميد : كان لازم أعرف ان الست مهما كان ست..
الرجل : (يدخل رجل ويتجه إلى حميد)
الرجل : الحق يا عم حميد.. فيه ناس وصلوا ع الشط..
لايسين أفندية ميرى..
حميد : عال.. عال..

الرجل : بيدوروا على واحد موش لاقيننه..
حميد : طب مع السلامة انت..
الرجل : (امرا) قلت لك مع السلامة.. (يفرك يديه فى فرح)
اذا كانت حتخرب خليها تخرب!! قال حب وغيره
وأطفال قال! (إلى نبوية التى تكون قد افاقت)
ابقى خللى مكرم ينفعك!..
(مكرم داخلا)
مكرم : ربنا يسهل وينفع بعض!
الجميع : (فى ذهول) مكرم! مكرم!
«اظلام سريع»

المشهد الثانى

(نفس المنظر نفس الأشخاص - سونة
ومحروس ونبوية وحميد ومكرم - يدخل
المحقق)

المحقق : فين المدعو حميد عبد المولى؟

حميد : أنا يا فندم..

المحقق : انت ازاي تسمح لنفسك بإزعاج السلطات؟ انت مش
عارف ان الإخبارية الكاذبة عقوبتها كبيرة؟

حميد : لكن يا فندم كل حاجة قلتها صح..

المحقق : غلط .. أنا بقى لى خمس ساعات دلوقت بابحث أوراق
المبنى اللى انت حددته..

حميد : بيت الشعب..

المحقق : (يضحك) آل بيت الشعب آل! بحثت الأوراق والدفاتر
وبورت أنا ورجالتي فى كل مكان ما قدرتش الاقى أثر
واحد للكلام اللى انت قلتته.. لا مخالفات مالية ولا
إدارية أو ارهاب للسكان ولا حد اسمه غريب ولا أى

حد خالص.. أنا مغفل! بقى معقول تبقى فيه حاجة
كده.. (يقرا) جمعية تعاونية زراعية صناعية نقابية
عمومية.. (يضحك) معقولة دى؟ أنا مغفل اللي
صدقت.. لكن أعمل إيه؟ الإخبارية وصلت والحكماء
أمرنا نيجى..

حميد : لكن أحلف لك يا بيه..

المحقق : خلاص.. كفاية.. لكن لازم أنذرك.. أى بلاغ كاذب
تانى حتروح فى داهية.. سلام عليك.. كانت ليلة يعلم
بيها ربنا!

(يخرج)

محروس : أنا موش فاهم حاجة خالص..!

نبوية : إيه اللي حصل يا حميد؟

سـونة : الراجل ده مين؟

مكرم : أنا حاشرح لكم كل حاجة.. بس الأول لازم أقول لكم
على الغلطة اللي وقعنا فيها كلنا.. أيوه كلنا.. انتو
الأول وبعدين أنا.. والغلطة دى خطرت لى وأنا فى
الحجز.. كنت قاعد لوحدى ممنوع من كل حاجة.. من
كل حاجة إلا نفسى.. فكرت وفكرت.. وكل ما كان
إحساسى بالضعف يزيد.. إحساسى بالوحدة
والعزلة.. كنت باحس بئى أقوى الأقوياء.. أقوى من
كل اللي عاملين جمعية ويتسندوا على بعض زى
أراجوزات السيرك.. أنا.. لوحدى.. بذاتى.
سـونة : أنا ما عدتش فاهمك ياسى مكرم..

محروس : أنا عمرى ما فهمته واصل..
مكرم : نبوية فاهمانى.. وحميد طبعاً.. والطابور الطويل اللي
مر عليهم وضاعوا.. نبيه وفرج وغريب..
محروس : وإبراهيم.. لازم؟
مكرم : لا.. إبراهيم لحسن الحظ نفذ بجلده فى اللحظة
الأخيرة.. أفرج عن نفسه ساعة ما أفرج عنى..
نبوية : أنا موش فاهماك يا مكرم..
مكرم : لا فاهمة.. الغلطة اللي أنا غلطتها هو أنى لما الغنم
راحت.. لما ضاعت.. اتصورت أن الناس كلها ممكن
تضيع هي روخره.. صحيح فيه ناس كتير ضاعوا زى
ما فهمنى حميد فى الأول.. لكن كنت قلقان على أهل
ميت حلاوة كلهم.. موش على واحد والا اثنين.. عرفتى
ايه بقى الغلطة؟ اتصورت ان الجمعية نجحت فى أنها
تخللى الناس تعيش من غير إحساس بالأرض..
بالمملكة.. بالغيرة.. بالامتلاك.. بالتسلط.. بالسيطرة..
محروس : كل ده ممنوع..
مكرم : مين اللي منعه؟ انت فاهم اللايحة دى بتقول ايه؟
عمرك درستها والا قرئت اللي فيها؟
محروس : أنا مخى على قدى.. لكن..
مكرم : مالكنش اللايحة بتقول ان احنا نعيش موش بنى
أدمن.. عشان ناس تانية تعيش ايه.. ايه يا حميد؟
انت ما بتتكلمش ليه يا راجل؟
حميد : اقول ايه؟

مكرم : تقول على اللى عملته من ورا كل اللى انخدعو بكلامك
الحلو.. كل اللى قتلهم أنا باحبكم وبلغت السلطات
عنهم..

(لحظة صمت متوترة لا يجد فيها حميد جوابا)
موش لاقى كلام تقوله صحيح؟ غريبة؟ مع انك كاتب
كلام كثير فى الإخبارية.. صفحات وصفحات.. ما
كنتش اعرف عنك الفصاحة دى.. والأفكار دى!

حميد : دى أفكار الجمعية! أفكار الناس..

مكرم : لا يا سعادة البية! الناس حاجة والجمعية حاجة..

نبوية : الفكرة انه الجمعية هي الناس يا مكرم..

مكرم : هي دى غلطتكو يا نبوية.. انتو قتلوا كده فى الأول
للناس.. صدقوكوا.. وبعدين قتلوها لنفسكو..
وصدقتوا نفسكو.. النهارده بس بان الدليل على ان
الناس مالهاش اى علاقة باللى كان بيحصل فى ميت
حلاوة.. حاقول لكو ازاي.. لما وصلوا الضباط من
مصر اتفزع إبراهيم.. (يضحك) مسكين..! جالى
جرى وهو بيتعرش.. كان خايف يقبضوا عليه.. والا
يضيعوه.. زى ما بتقولوا! هديته وقلت له ماتخافش
وحريت على بيت الشعب وخلصتكو من كل آثار
الكابوس ..

حميد : انت اللى ..

مكرم : أيوه يا حميد.. أنا اللى قطعت كل الأوراق .. أزلت آثار
الجمعية..

حميد : قطعت الورق .. والدفاتر؟
مكرم : الحقيقة ان الناس هي اللي ازال كل اثار البلوة دي..
المحقق قبل ما ييجي بيت.. الـ.. الشعب! فضل خمس
ساعات يلف ويدور ويسأل ويطقس.. ما فيش واحد
فتح بقة بكلمة.. ما فيش إنسان قدر يقوله انه كان فيه
جمعية.. ليه؟ لانهم بنى ادمين.. استحملوا وسكتوا..
جربوا الخوف والكبت والحرمان من غير ما يفقدوا
الإنسان اللي جواهرهم.. ولما جات لهم الفرصة إنهم
يرفضوا.. رفضوا.. وكل اللي عملته أنا اني حرقت
السجلات والتسجيلات اللي..
(حميد يحاول الخروج)

على فين يا حميد..
حميد : (يتسمر في مكانه) أبدا.. دانا كنت بس..
مكرم : ما تخافش.. احنا ما عدناش بنضيع حد ولا بنحتجز
حد.. خلاص..
محروس : وراح فين إبراهيم أفندي؟
سـونة : هو ما جاش ليه؟
مكرم : (يضحك) زمانه جاي.. أصله كان عند عيلة بيحاول
يقنعها تقيل..
سـونة : هو بيحبها؟
محروس : بس هي كانت عايزه واحد أفندي..
مكرم : يا محروس الحب ده حاجة موش بإيدينا..
محروس : هي اللايحة خلاص؟

مكرم : خلاص وستين خلاص.. انت يوم ما اكتشفت حبك
لسونة كنت بتدمر اللايحة.. والجمعية.. وسونة.. يوم
ما قررت انها تتجوزك كانت بتعلن رفضها للعملية
كلها..

نبوية : دا زى الحلم الجديد..

مكرم : انا موش حاسنخدم الكلمة دى من هنا ورايح.. انا
عايز أعيش فى الأرض.. مع الناس اللي اثبتوا انهم
رجالهم وأعظم رجالهم فى الوجود.. عشان جذورهم ثابتة
وعميقة فى الأرض.. الأرض الصلبة.. موش أرض
الحلم..

نبوية : وحبنا..

مكرم : حبنا كل حاجة فى حياتنا.. لانه حياتنا نفسها..
وحريتنا.. وسعادتنا..

نبوية : ونعمل ايه دلوقت؟

مكرم : تفتكرى نجعل ايه؟

نبوية : احتفال..؟

مكرم : لا لا لا.. كله الا الاحتفالات التلقائية بتاعة زمان!

(تدخل الراقصات والمغني والمغنية)

انصراف يا جماعة.. اللي عايز يحتفل يحتفل بيه..
بعيد..

(يدخل إبراهيم ومعه عيلة)

إبراهيم : (صائحا) وافقت!

عائلة : بس موش عايز يحدد المدة!

مكرم : تاييده يا عيلة! مؤيد! على طول..

عيلة : طوالى يعنى؟ على طول!

مكرم : ما عدتتش تفلتى واصل!

عيلة : واعيش فى المراكب مع الصيادين؟

مكرم : وجوه الميه وبره الميه!

(الراقصات يرقصن)

المغنية : مبروك يا ولادنا وعقبالنا.. الخ..

الشاعر : الليل بيضحك.. والقمر بيدور

ساجين فى حلم جميل مالوش آخر

ولما فلقنا برضه جانا النور

والشمس حاميه والسحاب ساير.

مكرم : وانت كمان تروح.. (الشاعر يسكت).

اللى عايز يغنى يغنى بعيد.. واللى عايز ينشد ينشد

بعيد.. الإنسان اكبر من أننا نشتره بلقمة وغنوة..

الإنسان هو اللى بيعمل الحياة على وش الأرض..

نبوية : طب وعشان خاطرى!

مكرم : (ضاحكا) طب غنوه واحدة وخلص..

(تعود المغنية والغناء والرقص بينما

يهبط الستار.. رويدا.. رويدا..)

«ستار»

دراسة نقدية

بقلم: د. سمير سرحان

بدأت رحلة الكاتب المسرحى محمد عنانى مع المسرح منذ عام ١٩٦٣، فهو من الرعيل الثانى من كتاب المسرح الحديث الذين ظهوروا بعد جيل نعمان عاشور وسعد وهبه ويوسف ادريس وغيرهم.. ولقد كانت النهضة المسرحية الكبرى التى بدأت مع أوائل الستينيات مع ظهور فرق التلفزيون المسرحية مسئولة عن ظهور عدد من الكتاب الشبان الذين أوتوا موهبة مسرحية خالصة.. وقد كف بعض هؤلاء عن الكتابة للمسرح بعد المسرحية الأولى، وقليل منهم من واصل الكتابة ليثبت بدايه وإخلاصه الشديد لهذا الفن العريق أن المسرح المصرى قادر أن يجدد نفسه دائما، وأن يفرخ جيلا بعد جيل من الكتاب الموهوبين الذين يعبرون عن ضمير هذا الشعب. ومن بين هؤلاء القلائل الذين لم يتساقطوا فى وسط الطريق الدكتور محمد عنانى..

وتجربة محمد عنانى فى المسرح لم تقتصر على مجرد التأليف.. وإن كان قد كتب عام ١٩٦٢ مسرحيته الأولى «الدرجة السادسة» التى كادت أن ترى النور بالمسرح الكوميدى من إخراج عبدالمنعم مدبولى.. ولكن دخوله إلى عالم المسرح الرحيب كان من عدة أبواب وليس من

باب واحد... كان من بينها باب الإعداد المسرحى عندما اشترك مع كاتب هذه السطور فى إعداد مسرحية «من أجل ولدى» عن القصة المعروفة للأستاذ محمد عبد الحليم عبدالله وكانت أول مسرحية تقدمها مسارح التليفزيون وأخرجها نور الدمرداش، وكذلك مسرحية «عندما نحب» عن قصة للأستاذ محمد التابعى. وكان أحد الأبواب التى دخل منها محمد عنانى إلى عالم المسرح السحرى هو باب الترجمة. فقد اشترك مع كاتب هذه السطور أيضا فى ترجمة مسرحية تشيكوف العظيمة «الخال فانيا» التى قدمها المسرح القومى فى موسم ١٩٦٤ وكان لها دوى هائل فى الأوساط الثقافية والمسرحية، وكذلك مسرحية «الخرتيت» وهى من روائع مسرح اللامعقول..

ولذلك فإن محمد عنانى عندما أقدم على تأليف مسرحيته الثانية «البر الغربى» كان قد تفرس بفنون العرض المسرحى والتجربة الحية فى ملامسة الجمهور والوقوف على نبضه.. ومن خلال التجربة الساخنة مع المسرح خصوصا فى مسرح الحكيم استطاع أن يكتشف عالمه ويكتشف موهبته ويسيطر على أدواته ككاتب مسرحى من خلال الإعداد والترجمة وتجربة أولى غير مكتملة هى «الدرجة السادسة».

وعندما ظهرت أول مسرحية له على خشبة المسرح فى موسم ٦٤ - ١٩٦٥ وهى «البر الغربى» أفصح عن موهبة مسرحية حقيقية، وعندما جاءت مسرحيته الثالثة «ميت حلاوة» أكدت أن موهبته قد نضجت ورسخت.. وأنه أصبح من الكتاب الذين نعول عليهم الكثير فى إثراء الحركة المسرحية..

والفارق بين «البر الغربى» و«ميت حلاوة» يكاد يبلغ عشر سنوات.. وهى السنوات التى تفرغ فيها الكاتب لنيل درجته العلمية فى الأدب الانجليزى.. ولكن تجربته الأكاديمية لم تصرفه عن المسرح، بل أكاد أقول إنه لولا هذه التجربة نفسها لما وصل محمد عنانى إلى ما وصل إليه الآن من نضج ككاتب مسرحى. فطوال هذه السنوات التى قضاهما فى انجلترا كان يختلف إلى المسارح المتعددة التى تمتلئ بها لندن، ويملا عينيه وحواسه ووجدانه بكل جديد ومثير من العروض المسرحية التى يموج بها المسرح الانجليزى. ولقد كان لهذا الاحتكاك المباشر بالمسرح الغربى أثره فى تطوير شخصية محمد عنانى ككاتب مسرحى وإثراء وجدانه وزيادة سيطرته على أدواته المسرحية.

والكاتب الأصيل هو ذلك الذى تشغله دائما موضوعات وتيمات معينة.. وهذا هو الحال مثلا مع إبسن الذى نجد عنده تيمة الماضى الذى يجثم بانفاسه على الحاضر حتى يدمره.. سنر ندبرج المشغول دائما بتيمة الحرب النفسية والجنسية والفكرية بين الرجل والمرأة.. وتشيكوف الذى نجد عنده تيمة الإحباط والعجز.. وهذه التيمات المترددة فى أعمال الكتاب الراسخين هى التى تعطى عملهم المسرحى مذاقا فريدا يميز كل منهم عن الآخر ويعطى تجربته طعمها الخاص.

وبالرغم من أن محمد عنانى ما زال أمامه شوط ليس بالقصير لى يصل إلى ما وصل إليه هؤلاء الراسخون.. إلا أنه اختار لنفسه مذاقا فريدا وعبر فى عمله الأخيرين عن تيمات مترددة من الواضح أنها تشغله منذ البداية. فالذى يتأمل «البر الغربى» و«ميت حلاوة»

بالرغم من الفارق الزمني بينهما، يجد أن الأحداث في كلا المسرحيتين تدور في قرية ساحلية صغيرة ليست موجودة على الخريطة وإنما تمثل في تكاملها ونظام حياتها عالماً قائماً بذاته له قوانينه الخاصة، أو كما يقول مكرم لغريب في «ميت حلاوة»:

«مكان ممتاز.. قدر ينسى الزمن زى الزمن مانسيه.. قدر يخلق لنفسه قوانينه الخاصة.. أحكامه الغريبة اللي محدش يفهمها غيره.. أصبح عالم غريب قائم بذاته.. زى عالم الفن».

وفي «البر الغربي» نجد أن هذه القرية الخيالية التي تحكمها قوانينها الخاصة تقع على النيل.. وفي «ميت حلاوة» قرية من طرح النيل نسيها الزمن كما نسيته بقية مصر. وأحدث الرئيسى الذى ينتظم كلا المسرحيتين هو حدث فانتازى خيالى.. أو من الممكن أن نسميه «حدث خارق» يلقي به المؤلف كالقنبلة فى بداية المسرحية ثم ينسج حوله أطراف الصراع ويكشف من خلاله أعماق الشخصيات ويتطور به إلى نهاية تكشف موقف الكاتب من الكون والحياة.

وفي «البر الغربي» نجد أن الحدث الخيالى الخارق هو ظهور حندوسة فى البر الغربى للنيل.. وحندوسة هو مجرم خطير يهدد القرية كلها بالدمار.. وإن لم يره أحد من أهلها على الإطلاق. وعند ظهوره فى بداية الحدث تصبح القرية كلها فى حالة توجس وخيفة من هذا الخطر الكامن. فحندوسة إذن هو «استعارة درامية» لفكرة الخطر الذى يتهدد مجتمعاً بأسره. ورغم ذلك فإن المؤلف يوظف هذه البداية الخيالية لكى يكشف عن الكثير من العلاقات الاجتماعية والإنسانية التى تسود هذا المجتمع الصغير.. إذ يتصافى أن يسمع أهل القرية

إطلاق الرصاص، فى نفس الوقت الذى يتصادف فيه مرور المدرس الإلزامى البسيط الساذج جمعة بساحة القرية وحده، وعندما يأتى من يعلن قتل حندوسة يتصور البعض أن جمعة لابد أنه هو البطل المغوار الذى أنقذ القرية من هذا المجرم العتيد. وتبدأ حركة العلاقات الإنسانية فى التغير، فبعد أن كان جمعة مدرسا عاديا بل ومثار سخرية الناس فى كثير من الأحيان، تحوله الحركة الديناميكية لمجتمع بأسره من صعلوك إلى بطل.. ثم إلى طاغية أشد خطرا على القرية من حندوسة نفسه. ولذلك فإن البطل فى هذه المسرحية ليس هو جمعة، وإن كان جمعة هو الشخصية الرئيسية فيها، وإنما هو القرية بأكملها فى خوفها من خطر وهمى.. وفى صناعتها للبطل.. ثم فى وقوعها ضحية لما صنعتته بأيديها عندما يتحول البطل إلى طاغية.

وفى «ميت حلاوة» يستخدم الكاتب نفس تكنيك «الحدث الخارق» الذى يفجر به الموقف الدرامى منذ البداية.. وهو ضمنا اختفاء ثلاثة أو أربعة آلاف رأس من أغنام القرية فى ليلة واحدة فى نفس الوقت الذى يصل فيه قادم جديد من القاهرة هو الأستاذ «غريب» مفتش الضرائب ليطالب أهل القرية - التى نسيها الزمن كما نسيته - بما تأخر عليهم من ضرائب لسنوات وسنوات..

ولكن.. ما هو الموقف الأساسى الذى يدخل فيه هذان العاملان الجديدان فيغيران من تركيبته ويفجران فيه قوى التغير والتغيير؟

نحن بإزاء قرية خيالية من طرح النيل غير موجودة على الخريطة نسيها الزمن كما نسيها بقية مصر هى قرية «ميت حلاوة». وهذه القرية استنتت لنفسها منذ سنوات عديدة نظامها الاقتصادى

والاجتماعى الخاص.. فهناك جمعية بها الماكل والملبس والغلال.. يأخذ منها كل حسب حاجته.. وهناك «مجلس إدارة» لهذه الجمعية يدير شئونها تتولى أموره نبوية وهى امرأة رائعة الجمال طاغية الشخصية تحكم قبضتها على أعوانها بيد من حديد حتى يسير النظام كما يريدون له أن يسير.

ولا يلغى نظام الجمعية الاحتكار فيما يتعلق بالأمور الاقتصادية فقط وإنما يلغى أيضا الكثير من المشاعر الإنسانية الطبيعية والفطرية مثل الحب والغيرة أو حب السيطرة التى يعتبرها جميعا جزءا من غريزة حب التملك والامتلاك التى قام نظام الجمعية ليقضى عليها. ويذهب النظام فى إلغائه لغريزة التملك إلى حد التطرف فيفرض نظاما خاصا للزواج، لا يصبح الزواج بمقتضاه عقدا أبديا بين رجل وامرأة، وإنما هو عقد ينتهى عند أجل معين بعده يصبح للزوجين من جديد حرية الاختيار فى أن يستمرا معا أو يختار كل منهما لنفسه شريكا آخر.

ورغم أن هذا الموقف الأساسى يشير إلى نظام اقتصادى معين، إلا أن الكاتب لا يحدد تماما هذا النظام بدولة أو مذهب سياسى بعينه وإنما يفضل أن يترك الأمور دون تحديد ليصبح نظام «ميت حلاوة» دلالة على أى نظام شمولى بشكل عام.

وبمجرد أن يرسى المؤلف هذه الأرضية المبدئية - النظام الشمولى بكل ما فيه من شعارات المساواة والغاء السيطرة. وحب التملك، الخ.. يبدأ شيئا فشيئا فى تعرية هذا النظام وإبراز ما ينطوى عليه من خلل أساسى. وهو يبذر بذور هذا الخلل منذ الحادثة الأولى -

حادثة اختفاء أغنام القرية.. وهى حادثة من الجسامة والخطورة بحيث يجب أن تزلزل كيان القرية نفسها ويجعلها تفيق إلى ما يوجد فى تكوينها الأساسى من خلل.. ولكن أحدا لا يبدو أنه يعطيها حجمها الحقيقى سوى شخصية واحدة هى مكرم، ذلك الموظف القاهرى الذى وفد على القرية منذ عدة سنوات معينا بها من قبل الحكومة فى القاهرة فوجد فيها حلمه.. حلم الحياة البسيطة.. أو يوتوبيا الحياة النموذجية التى يتخلص فيها الإنسان من كل تعقيد المدنية وصراعاتها ويتفرغ لصناعة السلال ومشاركة أهل القرية البسطاء احتفالاتهم البسيطة من تحطيب ورقص وغناء..

وإذا كان مكرم قد وجد ذاته وحلمه فى «ميت حلاوة» فيبدو أنه لم يتنبه فى البداية إلى أخطار النظام الاقتصادى والاجتماعى الذى استنته لنفسها.. ولذلك فعندما تحدث حادثة اختفاء الأغنام أو ضياعها يصطدم بها وعيه ويكون لوقع الصدمة دوى هائل فى نفسه يجعله يفيق من زيف الحلم الذى آمن به، ويفتح عينيه على الخلل الخطير الذى يجعل من «ميت حلاوة» واجهة لامعة وراءها أخطر الأمور..

فتفجر وعى مكرم منذ البداية ازاء حادثة الغنم وانكسار الحلم الذى عاش به فى «ميت حلاوة» هو الموقف الأساسى الذى يكشف عن الخلل أو «السرطان» الذى يكمن فى خلايا هذا الجسد اللامع من الخارج.. ويصاحب انهيار حلم مكرم انهيار قيمة الحب أيضا فى وعيه.. فمكرم يحب سونة ابنة القرية ولكنه يفاجأ وهو ينتظرها فى ساحة القرية عند المغرب أنها قد تزوجت فى الصباح.. يخبره بذلك

حميد ضمير القرية والنموذج النمطي لشخصيتها.. فهو الجالس دائما إلى شيشته يأخذ أعظم الأمور وأخطرها ببساطة مذهلة ثم لا يلبث في اجتماع مجلس إدارة الجمعية أن يمارس حقه كاملا في حماية هذا النظام الغريب بكل ضراوة.

ولنعد إلى مكرم فنقول إنه عندما يسمع من حميد بأن سونة التي عاهدته على الزواج قد تزوجت من غيره يصاب بخيبة أمل شديدة تسلمه إلى الشك في أن حب سونة له كان خداعا وسرابا.. ولكن حميد يطمئنه بأنها لم تخدعه وإنما هي ستقضى بوعدها بالزواج منه بعد أن ينتهى الأجل المحدد لعقد زواجها من محروس.. وهنا فقط يدرك مكرم الخلل الأساسى فى هذه اليوتوبيا التى كان قد رسم لها فى خياله ووعيه صورة وريدي، ويدرك أيضا أن «ميت حلاوة» ليست إلا آلة اقتصادية صماء تلغى إنسانية الإنسان وتحوله إلى ترس لا عقل له ولا قلب ولا روح.. ترس صغير لا أهمية له قد يضع كما ضاعت الغنم ومن قبلها الطنابير.. أو قد يحكم عليه بالضياح مثل نبيه وفرج..

ويؤكد المؤلف هذا المعنى بطريقة تهكمية ساخرة من خلال أعضاء مجلس إدارة الجمعية التى تدير أمور القرية فنبوية رئيسة الجمعية تصدر أوامرها بأن يكون التعبير عن المشاعر أثناء الاحتفالات «تلقائيا» وتحدد لهم فى نفس الوقت ماذا يقولون وكيف يعبرون عن أنفسهم بالضبط. ونبيه عندما يذهب إلى خارج القرية ليبيع أسماكها يتهم بالاتصال بجهات اجنبية ويحكم عليه بالضياح.. والجميع مطالبون بالتزام «الوحدة الفكرية» وهى طبعا كل ما ترضى عنه نبوية ومجلس الإدارة من أفكار.. والخروج على هذه «الوحدة

الفكرية» معناه الضياع.. الضياع المادى وليس مجرد الضياع المعنوى كل ذلك بالرغم من تشديد نبوية على أعضاء الجمعية بضرورة التعبير عن آرائهم بحرية تامة!

والنموذج الكامل لهذه «الوحدة الفكرية» هو زقزوق - محط سخرية المؤلف وسخريتنا. فزقزوق هو الذى يحفظ لائحة الجمعية عن ظهر قلب ويردد ما بها من كليشيهات وشعارات كالبيغاء دون فهم أو وعى.. ويستعرض فصاحته فى الخطابة حتى يبهر زوجته ظريفة!

والعامل الآخر الذى يكشف الخلل الأساسى فى تكوين «ميت حلاوة» هو وصول الأستاذ غريب الذى جاء يطالب أهل القرية بالعودة إلى حظيرة النظام الإنسانى الطبيعى... فالضرائب التى يطالب بها الأستاذ غريب فى البداية ليست إلا دلالة على شيء أعمق... وهو أنه قد حان الوقت لكى تصحو «ميت حلاوة» من سباتها وتعود إلى الانتماء إلى الوطن الأم.. فالأستاذ غريب يذكر أهل القرية أن هنا دولة تبنى لهم طرقا وتمدهم بخدمات أساسية كالإنارة والمياه... وأن هذا يمثل رابطا بينهم وبين عالم أوسع تسير فيه الأمور على نحو مغاير تماما لما تسير عليه فى «ميت حلاوة»..

وتدرك نبوية الخطورة الشديدة الكامنة فى وصول هذا الوافد الجديد الغريب.. فالمسألة ليست مجرد ضرائب وإنما هى أبعد من ذلك وأعمق... فوجود غريب يعنى فى الحقيقة بالنسبة لميت حلاوة تسلل أفكار غريبة على هذا النظام الشمولى الذى بنته نبوية ورعته هى ورجالها حتى أصبح واقعا، وهى أفكار تهدد النظام بالانهيار التام. ومن هنا يأتى الاجتماع العاجل الذى تعقده نبوية لدراسة

أفضل الطرق لإبعاد غريب بأسرع ما يمكن.. ولكن غريب ليس واحدا من أهل القرية يمكن الحكم عليه بالضيق فيضييع، وإنما هو ممثل الشرعية والقانون.. والحكومة.. والحق أى أنى به يعنى فى الحقيقة استعداد الحكومة المركزية وتذكيرها بالقرية التى نسيها الزمن.. وإذا كان من المستحيل إبعاد غريب فإن ميت حلاوة تقرر امتصاصه، تماما كما امتصت من قبله مكرم الذى وفد على القرية غريبا مثله من سنين..

ولكن غريب ليس «مكرم».. فمكرم رجل كان له حلم عظيم ووجد فى «ميت حلاوة» حلمه.. ثم اكتشف أن هذا الحلم قد خانه.. أما غريب فهو من ذلك الطراز من الرجال الذين لا يحلمون وإنما يتعاملون فقط مع حقائق الواقع الصلبة.. وهكذا يقرر غريب أن يمتص «ميت حلاوة» ويسرق تجربتها لحسابه الخاص قبل أن تمتصه هى.. وهو ينفذ خطته فى نفس اللحظة التى يبدأ فيها وعى نبوية فى التفتح على حقائق النفس البشرية التى تشكل إنسانية الإنسان وأهمها الحب والغيرة والمشاعر الخاصة.

ويقود غريب مجلس الإدارة فى انقلاب حاسم على نبوية ليخلعها من إدارة الجمعية بتهمة أنها سمحت للمشاعر الشخصية أن تسيطر عليها عندما وقعت فى حب مكرم وتزوجته.. وأنها فى حبها لمكرم وغيرتها عليه قد خرقت لائحة الجمعية التى تحرم مثل هذه المشاعر الدنيا فلم تعد تصلح للقيادة. وبعد هذا الانقلاب يتولى غريب بنفسه رئاسة الجمعية.

والحقيقة أن وقوع نبوية فى حب مكرم وبخولها فى منطقة

خصوصية المشاعر الإنسانية يمثل في مسرحية «ميت حلاوة» إرادة التغيير التي تأتي من داخل البشر أنفسهم وليس من خلال أى عامل خارجى من عوامل الحبكة الدرامية.. فالجمعية لم تغلح فى الحقيقة فى حل المشكلة الاقتصادية ورفوها ظلت دائما خاوية لا تحوى إلا أقل القليل بالرغم من كل الشعارات والاجتماعات والهتافات... وزقزوق نفسه أكبر المتحمسين - يعبر عن هذه الحقيقة المؤلمة عندما يقول بطريقته الخطابية المثيرة للسخرية: «كانت الخيرات تعم الجميع فى الماضى بينما يسود الفقر فى حقيقة الأمر وواقع الحال!»، ومع عجز الجمعية عن حل المشكلة الاقتصادية رغم كل الشعارات عجزت أيضا عن إلغاء إنسانية الإنسان، وأيضا رغم كل الشعارات!

ولقد عجزت كل محاولات نبوية نفسها أثناء رئاستها للجمعية عن قتل الشعور بخصوصية الحب الذى تتولد عنه بالضرورة مشاعر الغيرة وحب التملك.. ولكن المفارقة الأساسية التى يبنى عليها المؤلف تطور الحبكة هى وقوع نبوية نفسها فيما كانت تحذر منه أتباعها.. فهى أولا وأخيرا بشر.. وهى عندما أحبت مكرم بدأت تدرك قيمة المشاعر الإنسانية وتفرداها وخصريتها.. وهكذا - كما تقدم القول - يبدأ التغيير من داخلها هى.. عندما تتحول من طاغية إلى إنسانة تحب وتحاول حماية حبها بوصفه شيئا خاصا بها هى لا دخل للتجربة الشمولية فيه.. ومن هنا يتم دق المسمار الأخير فى نعش التجربة التى عاشت بها «ميت حلاوة» سنين طويلة عندما تدرك نبوية أنها ساهمت فى خلق وحش كبير - هو الجمعية - وسمحت له مع بقية أهل «ميت حلاوة» أن يلتهم إنسانيتهم..

وعند هذه النقطة تكون حركة الحدث قد سارت في خطوط متقابلة بعد أن كانت تسير في مستويات متوازية.. ففي الوقت الذي تدرك فيه نبوية إنسانيتها من خلال مكرم وتلفظ النظام الشمولى الذى صنعته بيديها يتحول غريب إلى طاغية حقيقى بعد أن يتخذ لنفسه زوجة من فتيات القرية وهى عبلة.. الفتاة البلهاء السانجة فى بداية المسرحية التى لا تلبث بعد زواجها من غريب أن تتصرف وكأنها مالكة الجمعية بما فيها مدامت زوجة صاحب السلطة.. وهنا يعطينا المؤلف صورة لذلك النوع من الحكام الذين يحولون التجربة السياسية إلى مغنم شخصى لهم.. ويصل هذا الاتجاه إلى قمته عندما يستولى إبراهيم بدوره على السلطة بعد أن يدبر انقلاباً ضد غريب.. فعندما يستولى إبراهيم على السلطة يصرح دون موارد ولا موارد أنه «لا يمكن إنعاش الريف دون إنعاش مجلس الإدارة».

والحقيقة أن إبراهيم الذى يأتى به الانقلاب الثانى ما هو إلا التجسيد الكامل لجرثومة الفساد التى كانت كامنة فى نظام الجمعية منذ البداية..

ويهمنى قبل أن اختتم هذه الدراسة العاجلة ان اتوقف قليلا عند الدور الذى يؤديه التوازى بين ثنائى مكرم ونبوية من جانب وغريب وعبلة من جانب آخر. فالتقابل والتضاد بين حركة الثنائى الأول وحركة الثنائى الثانى يمثل نقطة الارتكاز فى بناء المسرحية.. فبينما نجد أن حركة نبوية ومكرم الدرامية تبدأ بالتسليم بمواضع «ميت حلالة» وقوانينها الخاصة لتنتهى من خلال الحب إلى ادراك فساد تجربة الجمعية وبالتالي إدراك إنسانيتها وعثرهما على ذاتهما، نجد أن الحركة الدرامية لغريب وعبلة هى الخط المضاد لذلك.. فغريب

يبدأ برفض «ميت حلاوة» ثم ومن خلال الزواج القائم على المصلحة يستوعب تجربتها ويسخرها لمصلحته الشخصية. وعيلة لم تكن في البداية أكثر من فتاة بلهاء لا وعى لها بالأبعاد الكبرى لتجربة «ميت حلاوة» بعكس نبوية صاحبة التجربة وعقلها المفكر في البداية. وعندما تستولى عيلة على التجربة من خلال زواجها بغريب تتحول من البراءة السااذجة إلى إنسانة قد تجمدت إنسانيتها وأصبحت ترى كل شيء بعين السلطة التي تعطيها الفرصة لامتلاك ما ومن في بيت الشعب ويعدده ميت حلاوة ذاتها.

فالحركة في الثنائي الأول هي من الجمود وفقدان الذات إلى إدراك كل منهما لإنسانيته ومن خلال ذلك عثوره على ذاته ويعبر عن ذلك رمزيا صيحة مكرم المترددة في أعماق المسرح بأنه قد عثر على الغنم بالرغم من كل شيء... أما الحركة في الثنائي الثاني فيمكن وصفها بأنها حركة من البراءة إلى فقدان الذات وبالتالي فقدان كل من غريب وعيلة لإنسانيتهما.

إن «ميت حلاوة» مسرحية متعددة الخطوط متشابكة المستويات لا تكفى دراسة قصيرة كهذه أن تفيها حقها.. أو تفصح عن عمق رؤيتها الفنية وأحكام بنائها الدرامي الذي تلعب فيه كل شخصية وكل جملة من جمل الحوار وظيفة أساسية في الكشف عن أبعاد الحدث وتطويره... ولكن عذري هنا أن القارئ يملك أمامه المسرحية نفسها. وهي تفصح في نسيجها وتركيبها عن أن مؤلفها قد استطاع بعد رحلة دامت أكثر من خمسة عشر عاما مع المسرح أن يمتلك حقا كل أدوات الكاتب المسرحي المجيد... والأصيل.

د . سمير سرحان

مطابع الهيئة المصرية العامة للكتاب

رقم الإيداع بدار الكتب ١٩٩٤/٤٤٥١
I.S.B.N 977-01-3779-0